

# Jesus Aida-kidanii

## John Ati

### Di'oraz kaarita daua'o

*Di'ora'a kaarita apostle John saadanii, udyuuda-kaos dono'o munapo pidannao ai, paran zikon ia'o amazada Patmos iti, upataka'uta-kaos utomi- napatin-kidauzon idi'o pidannao Kaimana'o Kuwai dau'u, Jesus Christ daua'oraz.*

*John saadan di'ora'a kaarita'a mishidainao Jesus ati'o, pataka'uta-kariwainaoz pamishidan dikiin ii Jesus, ĩaitapa kizi Tominkaru wuru'u kazowautapa'oraz ipai aimaakan sha'apa'oraz kida ĩ'ati.*

*Usaadan di'ora'a Jesus aida-kidanii u'aqti, uzanda'awun ia'o kawanu'o utukapan, diina'iti'i daua'ora'a. John tukapanii kida kowaadan Jesus kazowautapa'o nii ipai pidannao na'iki aimaakannao, na'iki uru'o nii buuta na'iki pataka'uta pidan oia'o. Di'ora'a kaarita aida kapam mishidainao ati Jesus, na'iki na'apam di'ora'a imi'i baara katokon-tinan nii. Uaida kapam kaina'a'o nii pa'ina'o aokazi na'iki pa'ina'o imi'i baara. Na'ia'o nii mishidainao mashaapan Tominkaru na'iki Jesus tuma karikaonan, aonaa na'apainim nii utokon.*

### Kaarita buutinpan kida

Kaarita sakadin-kinaa . . . . .	1:1-8
Umanawunu'o aimaakan aida-kida-kaos John ati . . . . .	1:9-20
Choochinao ati'o . . . . .	1:1—3:22
Scroll na'iki 7 usakibadapa-kinao kida . . . . .	4:1—8:1
7 kuwudiinao . . . . .	8:2—11:19
Dragon na'iki dya'utam kichana'iki-kia'o pana'aokazinao	12:1—13:18
John tukapan pana'a kida'o aimaakan sha'apan . . . . .	14:1—15:8
Tominkaru to'oran shoota-kaos . . . . .	16:1-21
Babylon na'iki Satan wiinii-kaos . . . . .	17:1—20:10
Pidannao buuapa-kaos daua'o . . . . .	20:11-15
Pa'ina'o aokazi, imi'i baara, na'iki Jerusalem . . . . .	21:1—22:5
Jesus wa'atin nii . . . . .	22:6-21

Rev

**1** <sup>1</sup>Di'ora'a kaarita ida'a Jesus Christ aida-kidan aimakaan kida aona'oraz uaitapauzo-ka. Tominkaru aida-kidan Jesus ida'an papoitorunao ati kanom sha'apa'azon maonapa'a naa. Jesus dyuudan pa'angelin papoitoru John di'iti. Uaipan John aitapan ipai aimakaan, <sup>2</sup>na'iki John kowaada kizi ipai kanom patukapanii. Di'i wuru'u mishi'oraz kuwai Tominkaru Paradan di'iki'oraz Jesus Christ aida-kidaniaz. <sup>3</sup>Konaukia'o nii wuru'u pidan aitaapa'oraz di'ora'a kaarita'a na'iki konaukia'o nii wunaou'u abatainaouz na'iki taapai-naouz ukuwaanaa, usha'apanum kau'an maonapata'a naa usha'apan kamoon.

*John dyuudan paparadan  
7 choochi kida ati*

<sup>4</sup>Parada-karu kida John di'iki'o, 7 choochi<sup>a</sup> kida ati'o Asia Baara ia'oraz.

Marii Tominkaru kamunanun unao ati, na'iki utaa kizi unyukunuu kaiman-kinnaa nii. Uruu na'auzoz amazada toma-ka. Ua'ii, atii kai, na'iki karikaonanu'o nii una'an. Na'iki 7 doronainao di'iki'o mashaa-painaouz Tominkaru Taba kanaapu ii, <sup>5</sup>na'iki Jesus Christ di'iki'o kapam. Uruu karikaonanu'o ukuwaa mishiin, na'iki uruu kadishita'oraz kiwiin pamawaka-kizi iki, na'iki

uruu Naobanai ipai kingnao ati imi'i baara'a.

Jesus Christ marainpan idi waunao umawakan wa'ati, uso'otan wa'oian paizain ida'an. <sup>6</sup>Utoman ipai waunao Faadaanao nii pa'idiwaru, na'iki taainainao nii Tominkaru uDaru ati. Marii kizi utaapa-ka. Umanawunu'o nii na'iki ma'ozaka'o nii, karikaonan na'iki karikaonan. Amen!

<sup>7</sup>Uabata, utukapan nii  
uwa'atin isha'iz tuma,  
ipai'o nii pidannao tukapan,  
atii wunaou'u dakatainaouz  
uruu chipirari idi kapam.  
Ipai'o nii pidannao zaadan  
da'a'a imi'i baara'a  
itukapan dono uruu.

Na'apa'o nii mishizi! Amen!

<sup>8</sup>“Ōgaru Alpha na'iki Omega,”<sup>b</sup> Naobanai Tominkaru umanawunu'oraz kian padau'an, “Ōgaru na'auzoz amazada toma-ka. Ua'ii, atii kai, na'iki karikaonanu'o nii ōna'an.”

*Christ aidinan John ati*

<sup>9</sup>Ōgaru John unao inawuzu wamishidan idi Jesus kaimanaiman baokopa, watuudan nii ipai kasha'ora kida'oraz baiaapa-ka. Ua'ii, atii kai, na'iki karikaonanu'o nii una'an. Na'iki 7 doronainao di'iki'o mashaa-painaouz Tominkaru Taba kanaapu ii, <sup>5</sup>na'iki Jesus Christ di'iki'o kapam. Uruu karikaonanu'o ukuwaa mishiin, na'iki uruu kadishita'oraz kiwiin pamawaka-kizi iki, na'iki

<sup>a</sup> 1:4 7 choochi: mishidainao Jesus ati'o na'apa-karuz. <sup>b</sup> 1:8 Alpha na'iki Omega: A-B-C kawanu'o atii Z di'iti. Mazan Greek ida'an, usakadinan Alpha di'iki, ukatokontinan Omega di'iti. Tominkaru toma'oraz ipai aimakaan kida utoma-ka. Ua'ii, na'iki uruu katokonta'oraz ipai aimakaan kida.

zon idi Tominkaru Paradan, na'iki òkakuwaapan idi Jesus dau'u. <sup>10</sup>Naobanai kamoon dono'o, Tomin-karu Doronaa kazowautan ògaru, na'iki òabata diiwa'o parada-karu na'apa kuwudii<sup>c</sup> pootapa-kariwai aran kawan kadakotinan òbarau ikinapu.

<sup>11</sup>Parada-karu kian, "Ipai pusaada putukapanii kida, udauna'an pudyuuda'a naazu 7 choochinao di'iti, di'ora'a donoi kida di'ia'oraz ati, Ephesus, Smyrna, Pergamum, Thyatira, Sardis, Philadelphia na'iki Laodicea ia'oraz."

<sup>12</sup>Uruu dauna'an aka òtanawatina'akan naa òtukapa'azon kanom wuru'u kadakotina'oraz ò'ati, òtukapa 7 lamp saabatinapa-kizi kida toma-kariwai gold idi. <sup>13</sup>Ìbii'i òtukapa pidan kawanu'o, kaiwada-pa'o dawuu za'aba'i'o kamicha kaawa'o atii ukidiba di'iti, na'iki zadawii kawanu'o toma-kao gold idi ukaiwadapaniaz padokori'i ida'an, didimai morokoda-kao kawan. <sup>14</sup>Uzowaud baraka, baraka na'apa kinaridi baraka'oraz kawan, na'iki uawun pururu'ukappan na'apa tikazi kawan. <sup>15</sup>Ukidiba wizi'i, na'apa tawuru kawanu'u chipirari tikazi wizi'idaniaz. Na'iki uparadan abata-kao na'apa tozowan shaokodappan kawan. <sup>16</sup>Uzaamatan 7 wizinao padiwa'ora antanpu'o paka'u ida'a, na'iki marii dimana'o dya'utama'o udabaazi kida dimanainpan kodita'akan udako iki. Uawun baara kanadan, kanada

na'apa kamoo kanadan kawan, saki-tapa kamoo dono'oraz.

<sup>17</sup>Òtukapan idi'i naa uruu, òwashatina'akan naa òawun baara iki ukanaapu'u ukidiba dazaba'a ikoda tawuru'u mawaka'oraz naa. Upu'u mazan upishatan ògaru padiwa'ora antanpu'o paka'u idi, ukian ò'ati, "Mana'a putaria'ana'a! Ògaru kiwiitapa'oraz na'iki dawu'i-tiini'o, <sup>18</sup>na'iki karikaonanu'o nii òkakupan. Ògaru mawakauzoz da'i, mazan aizii òkakupan nii karikaonan na'iki karikaonan. Kaina'a òma'ozakan òwazoota-kinaa nii mawaka-karu na'iki òtaa-kinaa nii kakupa-karu mawakainao ati kapam. <sup>19</sup>Aizii pusaada'a naa ipai aimaakan putukapanii kida, sha'apa'o ni'oraz kai na'iki diina'iti'i. <sup>20</sup>Òkainaabatan nii pu'ati wuru'u aona'oraz uaitapauzo-kao, wuru kida dau'orazu'u: wuru'u 7 wizinao òzaamataniaz òdiwa'ora antanpu'o òka'u ida'a, na'iki wuru'u 7 lampanao saabatinapa-kizi kidaz toma-kariwaiz gold idi. Aizii wuru'u 7 wizinaouz, Angelnau wuru'u, ìnao wuru'u awunuutapa'o nii 7 choochinaouz, na'iki wuru'u 7 lamp saabatinapa-kizi kidaz, ìnao wuru'u 7 choochi kidaz."

### *Kaarita choochi ati'o*

#### *Ephesus ia'oraz*

**2** <sup>1</sup>Udauna'an ukian ò'ati, "Pusaada pukaaritan Angel ati wuru'u awunuutapa'oraz choochi Ephesus ia'oraz:

Rev

<sup>c</sup> 1:10 Kuwudii: Putukapa kaarita tokon ii, Parada-karu Masha'apannaada-kinoo di'ii.

“Dii wuru'u kuwaiz tawuru di'iki'ora'a, zaamatapa'oraz 7 wizinao, padiwa'ora antanpu'o paka'u ida'a, na'iki uruu chi'ika'anpa'oraz wunao bii ana'a 7 lampanao saabatinapa-kizi, toma-kariwaiz gold idi.

<sup>2</sup>“Ōaitapa ipai kanom unao sha'apaapanii. Ōaitapa dadara ukaudinan na'iki utuuda ipai kasha'ora kida'o sha'apa'o u'ati, na'iki aona'o nii uaipan oiainao pidannao kakinaopan unao, na'iki ōaitapa utiwaa-kidapanii mariidinazonao apostle-tinpa'azoinao, utukapa'azon idi ikuwaa mishiin. Mazan aonaa umishidan ikaki-naori. <sup>3</sup>Ōaitapa utuuda kasha'ora kida'oraz ubaiaapaniaz ōdikin ii na'iki aonaa ukashadinan. <sup>4</sup>Mazan kaina'a ōkowaada'azon u'ati aona'o ōnaudapan usha'apantan. Aona'a naa umarainpan ōgaru aizii, umarainpauzon kawan da'i ōgaru kiwiin. <sup>5</sup>Udi'tapa na'apam umarainpan ōgaru kiwiin. Aizii aona'a naa umarainpan ōgaru na'apa. Ukau'an utanawatina'a naa u'oiian ai, usha'apata kizi'i naa usha'apatauzonii kida da'i kiwiin. Mazan umatanawatinkan an u'oiian ai ōzikadan nii wuru'u ulampan saabatinapa-kizi pawiiizi iki.

<sup>6</sup>“Mazan ōaitapa kaina'a bada'apa aimaakan usha'apatanii kaimana'o, aonaa unaudapan Nicolaitannao<sup>d</sup> sha'apaapaniaz, ōgaru aonaa ōnaudapan kapamazu.

<sup>7</sup>“Puabatan an na'apam ōkian, ukau'an puabata'a naa na'apam Doronai kian choochinao ati! Kanom ma'ozaka'o na'iki wazoota'o oia'o, ōtaapadan nii unikan wuru aka'a paoribai taa'oraz kakupa-kinai, Tominkaru di'ia'oraz.”

***Kaarita choochi ati'o  
Smyrna ia'oraz***

<sup>8</sup>Udauna'an ukian ō'ati, “Pusaada pukaaritan Angel ati wuru'u awunuutapa'oraz choochi Smyrna ii:

“Dii wuru'u kuwaiz tawuru'u kiwiitapa'oraz na'iki dawu'itiini'oraz di'iki'o, uruu mawaka'oraz na'iki kakuda'oraz powaa iti koshan.

<sup>9</sup>“Ōaitapa pataka'utinainao unao, aonaa ukasha'apauzin, mazan unao kapuraatanu'o udoronaa ii! Ōaitapa oiaiman kida wunao kabootan papara-dan u'ati'i taapinpa'azoinaouz Jewnao nii, aonaa Jewnao mani i'dyaun. Īnao baokopa Satan di'iti'o i'zaamatinpan. <sup>10</sup>Mana'a pa'i utaria'a naa aimaakan kida ai maonapa'o ni'oraz naa ubaiaapan. Uabata! Satan tiwaa-kidapan nii unao, utaraa-kidan ida'an ubii iki pidannao, na'iki ubaiaainpan nii 10 kamoo. Pakawan pa'i umishida ōgaru, atii uzowia'azoo-kao di'iti ōdikin ii, na'iki ōtaan nii kakupa-kinai uwiniipa nii.

<sup>d</sup> 2:6 Nicolaitannao: sha'apaapauzonao pana'antanpu'o aimaakan Tominkaru Parandan ai.

11 “Puabatan an na'apam òkian, ukau'an puabata'a naa na'apam Doronai kian choochinao ati! Kanom ma'ozaka'o na'iki wazoota'o oia'o, aona'o nii ubaiaapan wuru'u itamautanuz mawaka-karu.”

***Kaarita choochi ati'o  
Pergamum ia'oraz***

12 Udauna'an ukian ò'ati, “Pusaada pukaaritan Angel ati, wuru'u awunuutapa'oraz choochi Pergamum ii:

“Dii wuru'u kuwaiz tawuru di'iki'ora'a taapa'oraz marii dimana'o, dya'utama'oraz udabaazi kida dimanainpan. 13 Òaitapanii wuru'u unao mashaapa-kiziz, na'ia'o Satan naobanai-tinpan. Upu'u pakawan unao da'anpan ògaru na'iki aonaa umarina'atan umishidan ògaru, atii tawuru dono'o Antipas kakuwaapatinauzon dono òdau'u na'iki aonaa umarina'atan pamishidan ògaru, atii uzowiauzo-ka'o na'ii Satan naobanai-tinapa-kizi ii.

14 “Mazan kaina'a masakauda'u aimakaan aonaa ònaudapan usha'apatan: kaina'a pabi'i kida pidannao unao bii'i da'anpainao Balaam kiki-naori; uruu dyuuda'oraz Balak sha'apata-kidan oia'o kida Israelitena'o ati, ìnikan ida'an wanyukunui kida taa-kariwaiz

ba'oran tominkarunao ati, na'iki udyuudan ida'an ìkiaapakan madoronaa-daun kapam.

15 Na'apa kapam kaina'a pabi'i kida pidannao ubii'i da'anpainao Nicolaitanna'o kakinaori.

16 Aizii, utanawatina'a naa u'oian ai, mazan umatanawatinkan an, kadimana'o ni'i naa òwa'atin u'ida'ati, òmizaa-taaka'anan wunao tuma'a matanawatin-kainaouz. Òmizaa-taakan nii wuru ida'ana'a, marii dya'utama'oraz udabaazi dimanainpan, kodita'oraz òdako iki.

17 “Puabatan an na'apam òkian, ukau'an puabata'a naa na'apam Doronai kian choochinao ati! Kanom ma'ozaka'o na'iki wazoota'o oia'o, òtaan nii u'ati diza-kariwaiz manna.<sup>e</sup> Òtaan nii kapam ipai ìkawana'ati baraka'o kuba, na'a'o nii upaawa'a pa'ina'o uuai saadinpan. Aona'o nii ba'oran pidan aitapanuz, soo wuru'u zaamata'o ni'oraz pa'an aitapazu.”

***Kaarita choochi ati'o  
Thyatira ia'oraz***

18 Udauna'an ukian ò'ati, “Pusaada pukaaritan Angel ati, wuru'u awunuutapa'oraz choochi Thyatira ii:

“Dii wuru'u kuwaiz Tominkaru Dani di'iki'o, uruu tawuru'u

Rev

<sup>e</sup> 2:17 *diza-kariwaiz manna*: uruu kotua'oraz Tominkaru tauzon papaa-kinnaa nii papidananna'o, ìkoditan dono'oraz Egypt iki.

pururu'ukappa'oraz uawun tikazi kawan, na'iki wizi'i'oraz ukidiba chipirari wizi'ii-kariwai kawan. <sup>19</sup>Ōaitapa ipai kanom usha'apaapanii. Ōaitapa pakawan utaapan umarain-paakan, umishidan ōgaru, ukamunan-kidaakan u'atiaaka na'iki utuuda kasha'ora kida'o ubaiaapanii. Ōaitapa powa'a zii usha'apatan kaimana'o kiwiitapa'o ai.

<sup>20</sup>“Mazan kaina'a ōkowaa-da'azon aimakaan u'ati aona'o ōnaudapan usha'apaapan: utaapada zii wuru'u zun Jezebel kakinaopan unao. Oroo, mariidapa'oraz pakowaa-dapan Tominkaru paradan ōpidanannao ati. Okakinao-pan ōpoitorunao pana'iti'o karikaonan, odyuudan ida'an ĩkiaapaakan madoronaa-daun, na'iki ĩnikan wanyukunui taa-kariwaiz ba'oran tomin-karunao ati. <sup>21</sup>Ōdyuudauzoni'i naa otanawatinan pa'oian ai, kotua'iki ōzaudapan, mazan aonaa omuuda'azon pakaduz.

<sup>22</sup>“Ukau'an, ōkarinaadan nii oroo tuukii pabedin paawa'a, na'iki wuru'u ba'orantapai-naouz odau'u, ōbaiaapa-kidan nii ĩ'ati kaziwa'o tuukii, mazan ĩmarina'atan an ipai wuru'u oii kida'oraz pasha'apaapan otuma, aona'o nii ĩbaiaapanuzu. <sup>23</sup>Ōzowian nii kapam ipai da'anpainao okakinaori kida, pidannao aitapa kizi ipai choochi kida kawana'ati ōgaru

wuru'u aitapa'oraz ipai pidannao nyukunuu na'iki ĩdi'itinpan. Ōpataka'utan nii ipai pidannao wuru kida kawana'ati'i, oii kida'oraz ĩsha'apatan.

<sup>24</sup>“Mazan kaina'a ba'oran pidannao Thyatira ii, aonaa ĩda'anpan wuru'u oia'oraz kakinaorii, uruu wuru'u aitapa-kida-kariwaiz pabi'i kida'o pidannao ati, ĩdakotaniaz Satan kakinaori kida nii. Ōkian u'ati, aona'o nii ōtaan ba'oran kakinaorii u'ati, <sup>25</sup>mazan dadara'a naa pa'i uzaamatinapa umishidan di'iti atii ōkaawan.

<sup>26</sup>“Kanom ma'ozaka'o na'iki wazoota'o oia'o, na'iki taa-pa'o ōdyuudanii usha'apatan atii amazada tokon di'iti, ōtaan nii u'ati ma'ozaka-karu ukazowautapa-kinnaa nii ipai amazada kawana'ati. <sup>27</sup>Na'iki ukazowautapan nii ĩdyaun, ipai pama'ozakan ida'an, ukaraa-bi'ian ĩdyaun na'apa aimakaan toma-kariwai kubai idi'o karaa-bi'ii-ka'o kawan duuza'u, na'apa ōDaru taan kawan ōma'oza-kan ōkazowautapa-kinnaa nii. <sup>28</sup>Na'iki ōtaan nii u'ati wizi chaapi'iki'oraz utukapauzo-ka'o.

<sup>29</sup>“Puabatan an na'apam ōkian, ukau'an puabata'a naa na'apam Doronai kian choochinao ati!”

***Kaarita choochi ati'o  
Sardis ia'oraz***

**3** <sup>1</sup>Udauna'an ukian ō'ati, “Pusaada pukaaritan Angel

ati wuru'u awunuutapa'oraz choochi Sardis ii:

“Dii wuru'u kuwaiz tawuru di'iki'ora'a kazowautapa'oraz 7 doronainao Tominkaru kanaapu iainaouz, na'iki zaamatapa'oraz 7 wizinao paka'u ida'a.

“Ōaitapa ipai kanom usha'a-paapanii. Ōaitapa kakupa'o kawanu'o utukapa-kaopadamata, umawakan pu'a'a naa. <sup>2</sup>Ukau'an upokoda'a naa, na'iki uma'ozakada'a naa wuru'u kaina'a sodi'oraz zii u'ida'a umawakan aia'a naa manawun. Usha'apanum kau'an ōaitapa usha'apata-nii kidaz aona'o zii uturuan ōTominkarun ati. <sup>3</sup>Unyukunuitapa ukau'an na'apam da'i utominapa-kidauzo-kaouabatauzoniaz dau'u. Uizo'atizu, na'iki utanawatina'a naa u'oian ai. Umapokodakan an, ōwa'atin nii u'ida'ati koidimiki kawan, na'iki aona'o nii uaitapan na'apainim nii ōkaawan. <sup>4</sup>Mazan kaina'a masakauda'u pidannao ubii'i Sardis ii aona'o ūkaniriban pakamichan. Ūchi'ikapan nii ōtuma, ūkaiwadan nii baraka'o kamicha, usha'apanum kau'an kaiman ūmashaapan uaiapa-kaokawana'ati. <sup>5</sup>Kanom ma'ozaka'o na'iki wazoota'o oia'o, kaiwada-kida-kaonii u'ati baraka'o kamicha, na'iki aona'o nii ōmainaabatan u'uu wuru di'iki'i

kakupa-karu kaaritannaaz;<sup>f</sup> ōkowaadan nii ōDaru na'iki Angelnao kanaapu'u, uruu ōda'anpiki.

<sup>6</sup>“Puabatan an na'apam ōkian, ukau'an puabata'a naa na'apam Doronai kian choochinao ati!”

***Kaarita choochi ati'o  
Philadelphia ia'oraz***

<sup>7</sup>Udauna'an ukian ō'ati, “Pusaada pukaaritan Angel ati wuru'u awunuutapa'oraz choochi Philadelphia ii:

“Dii wuru'u kuwaiz tawuru di'iki'ora'a kaimana'oraz na'iki mishi'oraz ukuwaa. Uruu wuru'u zaamatapa'oraz David keyan. Na'apainim uda'atan an paniinom, aonaa turuu pidan taratan; na'iki utaratan dono paniinom, aonaa turuu pidan da'atanuzu.

<sup>8</sup>“Ōaitapa ipai kanom usha'a-paapanii. Utukapa! Kaina'a ōmuudan ukanaapu'u da'atinpa'o paniinom, aona'o turuu pidan taratan. Ōaitapa kaina'a masakauda'u uma'ozakan na'iki upu'u zii mazan utaa-pan ōkakinaori na'iki aonaa umarina'atan ōgaru. <sup>9</sup>Na'iki utukapa, wunaou'u zaamatinpainaouz Satan di'iti, ūnao mariidinauzonao, taapinpa'azoinaouz kapam Jewnao nii, aonaa Jewnao mani idyaun. Ōdapadan

Rev

<sup>f</sup> 3:5 *kakupa-karu kaaritannaaz*: Tominkaru pidannao uu saada-kizinao, ūmashaapan nii Tominkaru tuma karikaonan.

nii ĩdyaun u'ida'ati ĩdawuka kizi u'ati ukanaapu ikinapu ukidiba dazaba'a, na'iki ĩaitapan nii ōmarainpan unao. <sup>10</sup>Utaapan idi ōkākinaori, utuudan ida'an ipai kasha'ora kida'o ubaiaapaniaz, ōkazannaatan nii unao kichana'-iki-kii kida'o ai, kaawa'azo'oraz naa imi'i baara ati tiwaa-kidapa'azo'oraz naa ipai pidannao da'a'a imi'i baara'a.

<sup>11</sup>“Kadimana'o ni'i naa ōwa'atin. Dadara pa'i uzaamatapa kaina'a'oraz u'ida'a, aonaa utaapada'ana'a pidan koidapan u'ai wuru'u uwinipaz ōtaa'azooniaz. <sup>12</sup>Kanom ma'ozaka'o na'iki wazoota'o oia'o ōtoman nii uruu na'apa ma'ozaka'o tooro kadishitapa'oraz Tominkaru Dapu ia'oraz kawan, aona'o nii na'apainim ukoditan unazo iki. Ōsaadan nii umuna'a ōTominkarun uu, na'iki donoi ōTominkarun idiwauz uu, wuru'u pa'ina'oraz Jerusalem, wa'ati'o ni'oraz aokazi iki ōTominkarun di'iki. Ōsaadan nii kapam umuna'a pa'ina'oraz ō'uu.

<sup>13</sup>“Puabatan an na'apam ōkian, ukau'an puabata'a naa na'apam Doronai kian choochinao ati!”

***Kaarita choochi ati'o  
Laodicea ia'oraz***

<sup>14</sup>Udauna'an ukian ō'ati, “Pusaada pukaaritan Angel ati

wuru'u awunuutapa'oraz choochi Laodicea ii:

“Dii wuru'u kuwaiz Amen<sup>g</sup> di'iki'oraz, uruu kaimana'o pidan, mishi'o ukuwaa Tominkaru dau'a'o, uruu ida'ana'o Tominkaru toman ipai aimakaan.

<sup>15</sup>“Ōaitapa ipai kanom usha'apaapanii. Ōaitapa aonaa uwadidin oo uwiichan. Ōaipan unao bauda'apa'o ida'a oo ba'oran di'ii mani padamata! <sup>16</sup>Mazan uwiichan idi masakauda'u sodi karikao-nan, na'iki aonaa uwadidin oo uwiichan, ōporikadan nii unao ōdako nazo iki. <sup>17</sup>Usha'apanum kau'an ukian, ‘Ōgaru kasha'apauzi'o manawun, ipai kanom ōaiapanii kaina'a ō'ida'a, aona'a naa kanom ōaipan powa'a.’ Mazan aonaa uaitapan unao pataka'utinainao na'iki aonaa aimakaan nii u'ida'a, unao masha'apauzi'o, ishaawun na'iki makamichanu'o. <sup>18</sup>Ōkākinaotan unao ukau'an, utorii gold ō'ai kaimana'oraz naa usaabaa-kaotikazi idi, ukasha'apauz kizi. Utorii kapam baraka'o kamicha ukamichan nii, udiza kizi wuru'u kakiba'azonna'oraz umakamichanun. Utorii kapam kasarai uzichii-kinaa nii uawun kida utukapa kizi kaiman.

<sup>19</sup>“Ipai ōkākinaotan na'iki ōpataka'utan ōmarainapaniinao.

<sup>g</sup> 3:14 *Amen*: Jesus dakotan paugaru ‘Amen’ nii.





*Jesus dau-daupan paniinom (3:20)*

Ōaipan idi iizo'atin ōparadan pa'an, ukau'an mishi'i naa pa'i umarina'ata u'oian. <sup>20</sup>Dii ōgaru'u, ōkadishitapan panii-nom ida'a, ōdau-daupanuz; na'ia'oram pidan abatan an ōparadan na'iki da'ata'o panii-nom, ōmorotan nii u'idi'iti na'iki ōarootan nii utuma.

<sup>21</sup>“Kanom ma'ozaka'o na'iki wazoota'o oia'o, ōtaapadan nii usakanatan ōtuma ōtaba ida'a, na'apa ōwazootan kawan oia'o na'iki ōsakanatan kawan ōDaru

tuma utaba di'ii.

<sup>22</sup>“Puabatan an na'apam ōkian, ukau'an puabata'a naa na'apam Doronai kian choochi-nao ati!”

*Taain-karu Tominkaru ati aokazi ii aida-kida-kaō*

**4** <sup>1</sup>Uruu dauna'an ōtukapa aokazi ii paniinom da'atinpa'o! Na'iki ōabatan tawuru'u kiwiini'oraz uparadauzon da'i ō'ati, diiwa'o kuwudii aran kawan'oraz da'i uparadan. Ukian, “Puwa'ati da'ati'i, ōaida kizi pu'ati kanoma'o nii sha'apa diina'iti'i.” <sup>2</sup>Sariapa Tominkaru Doronaa kazowautan ōgaru. Ōtukapa aokazi ii umanawunu'oraz manawun tabai,<sup>h</sup> kaina'a pidan sakanatapan upaawa'a!<sup>i</sup> <sup>3</sup>Pidan sakanatapa'oraz upaawa'a aidinpan kanada na'apa jasper na'iki carnelian kawan, na'iki kaina'a kiwari'i<sup>j</sup> awauta uawautapan wuru'u umanawunu'oraz manawun tabai, na'apa uaidinpan emerald kawan.<sup>k</sup>

<sup>4</sup>Kaina'a ba'orainao, 24 manawun kida'o tabainao, awauta iawautapan wuru'u bauda'apa'oraz umanawunu'oraz manawun tabai. Na'iki wuru ida'a'a umanawun kida'oraz tabainao, kaina'a 24 kazowautapainao<sup>l</sup> sakanatapan,

**h** 4:2 *umanawunu'oraz manawun tabai*: Tominkaru taba wuru'u, udakota-kaō 'throne' kii English ida'an. **i** 4:2 Wururu'u pidan sakanatapa'oraz umanawunu'oraz manawun tabai ida'a, uruu Tominkaru. Putukapa verse 11. **j** 4:3 *kiwari'i*: oo kuwari'i; English ida'an udakota-kaō rainbow. **k** 4:3 *jasper, carnelian na'iki emerald*: kawinipinaa kida'o kuba, kanuunu'o, mazan wuzo'o oo ko'ori'o kapam. **l** 4:4 *kazowautapainao*: umanawuniinao, foomaannaō kawanu'o.

ĭkaiwadapanii baraka'o kamicha kida, na'iki king kowam kida, gold idi'o utoma-kao. <sup>5</sup>Na'iki umanawunu'oraz manawun tabai di'iki, toroanaru turuinan na'iki kan-kan-kia'o. Na'iki umanawunu'oraz manawun tabai kanaapu'u 7 lamp kida maodapan. ĩnao wuru'u 7 doronainao Tominkaru di'ikiinaouz. <sup>6</sup>Na'a kapam umanawunu'oraz manawun tabai kanaapu'u, paran kawanu'o, ikoda glass taidada, na'iki kanuunu'o crystal<sup>m</sup> kawan.

Na'iki awauta wuru'u umanawunu'oraz manawun tabai daba'a antanapu kida, kaina'a 4 kakupa'o aimaakannao kida, kaina'a ĩawun pananaa an kida, ĩkanaapu ikinapu na'iki ĩbarau ikinapu. <sup>7</sup>Bauda'apa aimaakan aidinpan na'apa lion<sup>n</sup> kawan; ba'oran aidinpan na'apa tapi'iza kazoti kawan; ba'oran aidinpan pidan awun baara kawanu'o uawun baara; na'iki ba'oran aidinpan na'apa udaru'o kokoi zuutapa'o kawan. <sup>8</sup>Ipai wuru'u 4 kakupa'oraz aimaakan kida, kaina'a 6 ĩkutuba kida, ipai ĩkutuba ida'a kaina'a ĩawun kida upaawa iki na'iki uwaranu iki kida. Ipai kamoo na'iki maruta'o karikaonan ĩkunuitinauzon kaikapa'a:

“Kaimana'o, kaimana'o,  
kaimana'o  
Naobanai Tominkaru  
umanawunu'oraz,

uruu na'auzoz amazada toma-kao ua'ij,  
atii kai, na'iki karikaonanu'o  
nii una'an.”

<sup>9</sup>Na'apainim 4 kakupa'oraz aimaakannao kunuuan kunui kida, ĩkonaukii-kidan, na'iki ĩkowaadan pataapan uruu umanawunu'o nii. Na'iki kaiman ĩkian wuru ati'i Sakanatapa'oraz umanawunu'oraz manawun tabai ida'a, uruu wuru'u kakupa'oraz karikaonan na'iki karikaonan. <sup>10</sup>Uruu dono wuru'u 24 kazowautapainaouz, ipai ĩwashatinan wuru kanaapu'a'a sakanatapa'oraz umanawunu'oraz manawun tabai ida'a, ĩmanawuntapan uruu kakupa'oraz karikaonan na'iki karikaonan. Ipai ĩtaan pakowam king kowam kaduz kida wuru kanaapu ati'i, umanawunu'oraz manawun tabai. ĩkunuuan naa kaikapa'a:

<sup>11</sup> “WaNaobanaa Tominkaru!

Soo pugaru konaunama'o,  
umanawunu'o,  
na'iki ma'ozaka'o  
karikaonan,  
usha'apanum kau'an  
putomanii  
ipai aimaakan.

Puaipan ati'o ĩtominan na'iki  
ĭkakupan.”

*Kaznizo-dani<sup>o</sup> zaamatan  
scroll<sup>P</sup> Tominkaru di'iki.*

**5** <sup>1</sup>Uruu dauna'an otukapa  
wuru'u Sakanatapa'o-

<sup>m</sup> 4:6 *crystal*: kawinipina'o kuba, kanuunu'o.


<sup>n</sup> 4:7 *lion*: udaru'o baudokoru.

<sup>o</sup> 5:1 *Kaznizo-dani*: Putukapa John 1:29 ida'a.

<sup>P</sup> 5:1 *scroll*: Putukapa kaarita tokon

ii, Parada-karu Masha'apannaada-kinao di'ii.

raz umanawunu'oraz manawun tabai ida'a, uzaamatapan scroll padiwa'ora antanpu'o paka'u idi. Ipai saada-kariwai kida kaina'a ubarau an na'iki unazo ikinapu, na'iki kaina'a 7 usakibadapa-kinao kida umuna'an. <sup>2</sup>Na'iki otukapa umanawunu'o Angel, na'iki obata ukian diiwa'o ida'an. "Kanom kaimana'o manawun, turua'o uso'otan wuru'u scroll sakibadapa-kinao kidaz, na'iki uda'atanuzu?" <sup>3</sup>Mazan aonaa bauda'apa aokazi iki'o, oo imi'i baara iki'o, oo imi'i waranu iki'o turuan pada'atan scroll, oo tukapan unazo ia'o. <sup>4</sup>Uru'u naa ozaadan tuukii, usha'apanum kau'an aonaa kanom ikoda-kaao kaimana'o nii turua'o uda'atan scroll, oo utukapan unazo ia'o saada-kariwaiz.



*sakibadapa-kariwai zii (5:4)*

<sup>5</sup>Upu'u bauda'apa kazowautapainao bii iki'o kian o'ati, "Mana'a puzaada'ana'a. Putukapa! Wurru'u dakota-kariwaiz umanawunu'o Lion nii, Judah takaan-daunuz, na'iki uruu kapam David takaan-daun, uruu wazoota'oraz oia'o, na'iki turuu uso'otan 7 sakibadapa-kariwai scroll di'iki, na'iki uda'atanuzu."

<sup>6</sup>Udauna'an otukapa Kaznizodani kadishitapan maonapa

umanawunu'oraz manawun tabai dazaba'a wunao sakodaitapaniaz 4 kakupa'o aimaakannao, na'iki kazowautapainao. Wurru'u Kaznizodaniz zowiauzo-kariwai kawanu'o uaidinpan. Kaina'a 7 u'ozoo kida na'iki 7 uawun kida. Inao tawuru'u 7 doronainao Tominkaru di'ikii-naouz, dyuudauzo-kariwainaoz ipai amazada kawana'ati da'ati'i imi'i baara ati. <sup>7</sup>Kaznizodani makon uzaamatan scroll Sakanatapa'o umanawunu'oraz manawun tabai ida'a'o di'iki, udiwa'ora antanpu'o uka'u di'iki.

<sup>8</sup>Uzaamatan dauna'ana'a naazu uru'u naa wurru'u 4 kakupa'oraz aimaakannao na'iki 24 kazowautapainao, ipai iwashatinan wuru kanaapu itil'i Kaznizodaniz. Ipai i'zaamatapan shamoro<sup>9</sup> kida na'iki boon kida gold idi'o utoma-kaao paida'o shanaribai idi, uruu wurru'u Tominkaru pidanannao toriinpan kidaz. <sup>9</sup>Udauna'an ikunuuan pa'ina'o kunui:

"Pugaru kaimana'o,  
puturuuda mishi  
puzaamatan scroll,  
na'iki puso'otan  
usakibadapa-kinao kida.  
Usha'apanum kau'an pugaru  
zowiauzo-kariwai.  
Pumawakan ida'an,  
pukazannaatan pidannao  
Tominkaru ati  
ipai amazada kida di'iki,  
ipai wiizai kida di'iki,  
ipai bakadun kida iparadan,

Rev

<sup>9</sup> 5:8 *shamoro*: Putukapa kaarita tokon ii, Parada-karu Masha'apannaada-kinao di'ii.

na'iki ipai pana'a kida'o  
pidannao.

Aizii ipai itaainan Tominkaru  
ati.

<sup>10</sup> Putoman idyaun Faadaanao  
nii pa'idiwaru,  
taainainao nii Tominkaru  
ati.

Na'iki inaou'u nii kazowautapa  
da'a'a imi'i baara'a.”

<sup>11</sup> Uruu dauna'an koshan  
ōawunuupan, ōtukapa angelnao,  
iriba'o manawun idyaun aonaa  
īaita-kaō kawana'ati, awauta  
īkadishitapan īzikonuitapan  
wuru'u umanawunu'oraz tabai, 4  
kakupa'oraz aimaakannao na'iki  
wuru'u 24 kazowautapainao kidaz.  
<sup>12</sup> Na'iki ōabata angelnao kunui-  
pan naa diiwa'o ida'an. Kaikapa'a  
īkunuunu'u:

“Wuru'u Kaznizo-dani  
zowiauzo-kariwaiz,  
kaimana'o uruu.

Marii kizi mishi ukonaukii-  
kida-kaō umanawunun idi,  
ukasha'apauzin idi,  
uaitapaaban idi, uma'ozakan  
idi, ukamarainapanun idi,  
ukanadan idi,  
na'iki turuu kizi kaiman  
kii-karu u'ati.”

<sup>13</sup> Uruu dauna'an aka ōaba-  
tan ipai aimaakan kida kunuipan,  
aokazi ia'o, imi'i baara'a'o, imi'i  
waranu ia'o na'iki paran baoko ia'o,  
na'iki ipai aimaakannao mashaapai-

nao ipai amazada kawana'ati. Ipai  
īkunuipan kaikapa'a:

“Wuru ati'i Sakanatapa'oraz  
umanawunu'oraz  
manawun tabai ida'a,  
na'iki wuru ati'i  
Kaznizo-daniz.

Marii kizi turuu kaiman kii-karu  
ī'ati, na'iki īmarainapa-kaō.  
Marii kizi kakuwaapa-karu  
īmanawunun na'iki  
īma'ozakan dau'u,  
karikaonan na'iki  
karikaonan.”

<sup>14</sup> Wuru'u 4 kakupa'oraz aimaa-  
kannao kian “Amen!” Uru'u naa  
kazowautapainao washatina'akan  
naa paawun baara ukinapu imi'i  
baara iti, itaainan naa Tominkaru  
ati na'iki Kaznizo-dani ati.

*Kaznizo-dani so'otan sakibadapa-  
kariwai kida scroll di'iki*

**6** <sup>1</sup> Ōawunuutapan pu'u Kaznizo-  
dani so'otan kiwiitapa'o  
scroll<sup>r</sup> sakibadapa-kinao. Ōabata  
bauda'apa, 4 kakupa'o aimaakan-  
nao bii iki, parada-karu turuinan  
diiwa toroanaru kawan. Ukian,  
“Da'ati'i!” <sup>2</sup> Ōawunuupa'akan, na'ii  
ōtukapa baraka'o kawaro. Kaina'a  
zaidapa'o ubarau'u, kabairi'o, na'iki  
ōtukapa kowamai taa-kaō u'ati, king  
kowam kaduz idi. Uruu umakon naa  
umizaataakapaanan, ipai uzowian  
mizaataakapainao patuma, ipai  
utarubanao kaakinpan u'ati, uruu

<sup>r</sup> 6:1 *scroll*: kaarita katoridau'u upapidapa-kaō oo soolaa-kariwai madai kaiwauzo-  
kariwai saadapa-kizai nii. Panaadon da'i kaina'a usakibadapa-kinao kida, panaadon  
da'i bouda'apa oo iriba umuna an kida, maabaiba kawanu'o usakadan idi.

ukau'an ma'ozaka'o nii manawun ĭ'ai.

<sup>3</sup>Uruu dauna'an Kaznizo-dani so'otan 2nd sakibadapa-kariwai scroll di'iki. Ōabata koshan ba'oran kakupa'o aimaakannao bii iki'o kian, "Da'ati'i!" <sup>4</sup>Ba'oran kawaro aidina'akan, wuza'o pa'an. Kaina'a zaidapa'o ubarau'u, taa-kao ma'ozaka-kinai u'ati, umizaataaka-kida-kinaa nii imi'i baara'a pidannao pa'atiaka, na'apa'o ida'an kizi ĩmawakan. Uruu idi udaru'o marii taa-kao u'ati, mizaataaka-kinai marii, dya'utama'o udabaazi kida dimanainpan.

<sup>5</sup>Udauna'an Kaznizo-dani so'otan 3rd sakibadapa-kariwai scroll di'iki. Ōabata koshan ba'oran kakupa'o aimaakannao bii iki'o kian, "Da'ati'i!" Ōawunuupan, na'ii ōtukapa podidi'o kawaro. Kaina'a zaidapa'o ubarau'u, uzaamatapa dya'utam kimisha'o aitaaribanaa paka'u ida'a. <sup>6</sup>Na'iki ōabata parada-karu wunao bii iki'o kawanu'u 4 kakupa'o aimaakannao. Kaikapa'a kii-karu'u: "Bauda'apa'o kamoo pidan kaudinan winipinaa ida'an turuu utorian soo bauda'apa kilogram poroom, oo turuu utorian soo idikinauda'u kilogram barley. Mazan aonaa pa'i pudokooda'ana'a olive oil na'iki wine winipinaa."<sup>s</sup>

<sup>7</sup>Udauna'an Kaznizo-dani so'otan 4th sakibadapa-kariwai scroll di'iki. Ōabata koshan ba'oran kakupa'o aimaakannao bii iki'o kian, "Da'ati'i!" <sup>8</sup>Ōawunuupan, na'ii ōtukapa kidai'o kawaro. Kaina'a

zaidapa'o ubarau'u, u'uu Mawakakaru, na'iki kaina'a Mawakainao Wiizi da'anpan uruu. Ipai ĩnao ati ma'ozaka-karu taa-kao ĩzowii-kinaa nii 1/4 pidannao da'a'a imi'i baara'a. Wuru kida idi'o nii pidannao mawakanu'u: mizaataaka-karu idi, zamazi-karu idi, karinaa-karu bakadun kida rinai idi, na'iki kichana'iki-kii kida'o aimaakannao zowian nii ĩdyaun.

<sup>9</sup>Udauna'an Kaznizo-dani so'otan 5th sakibadapa-kariwai scroll di'iki, na'ii ōtukapa altar dazaba'a, pidannao doronaa kida, zowiauzo-kariwainaoz ĩmishidan idi manawun Tominkaru Paradan na'iki ĩmamashaada'azookan idi pakakuwaapan udau'u. <sup>10</sup>Diiwa'o ida'an ĩkian, "Umanawunu'o Nao-banai, kaimana'o na'iki mishi'o! Mana'a naa puzaudapa'ana'a powa'a! Kai'i naa pupataka'uta wunaou'u imi'i baara ainaouz zowiauzonaouz waunao, pukaunaata'a naa waunao." <sup>11</sup>Uruu dauna'an ipai ĩkawana'ati baraka za'aba'i kida'o kamicha taa-kao ĩ'ati. Udauna'an ĩdyuuda-kao ĩsookapa'anan masakauda'u, atii ba'oran mishi-dainao, kaudinainaoz Jesus ati, zowii-kao na'apa ĩnao zowii-kao kawan, ĩaita-kao kawana'ati.

<sup>12</sup>Uruu dauna'an ōtukapa Kaznizo-dani so'otan 6th sakibadapa-kariwai scroll di'iki. Na'iki ōtukapa imi'i nakainan ma'ozaka'o ida'an, na'iki kamoo marutan podidi'o kamicha kawan, na'iki kauzu

Rev

<sup>s</sup> 6:6 Zamazi dono, kawinipinaa wanyukunui sellii-kao.

tukapa-ka'o wuza na'apa izai kawan. <sup>13</sup>Wiizi kida waotan imi'i baara ati na'apa ma'ozaka'o awaru waotakidan kawan pa'ishizo'o akai kida pakadunaa di'iki. <sup>14</sup>Aokazi papidinan na'apa scroll kawan, na'iki umainaabatanan. Midukuo kida na'iki imi'i baara paran ii kida'o, ipai'o nii ïzikada-ka'o pawiiizi iki kida.

<sup>15</sup>Uruu idi ipai kingnao da'a'a imi'i baara'a, ipai kazowautapainao na'iki ipai soldyaanao zowaunaanao, na'iki kapuraataniinao na'iki ma'ozakainao na'iki ipai poitoruinao na'iki aonaa poitoruinao mani, ipai'o nii ïdizinan udaru'o kuba uun nazo ii kida na'iki kuba tuu'uz kida oroda an midukuo ii. <sup>16</sup>Diiwa'o ida'an ïkian midukuo kida na'iki kuba kida ati, "Uwaota wa'ida'ati udiza kizi waunao Sakanatapa'o umanawunu'oraz manawun tabai ida'a'o ai, na'iki Kaznizo-dani pataka'utan ai waunao. <sup>17</sup>Uruu kichana'iki-kii kida'o pataka'utin-karu kamoo kaawan naa wuru'u: kanoma'o nii tuudazu?"

**144,000 Israelitenao kainaabata-ka'o Tominkaru ati**

**7** <sup>1</sup>Uruu dauna'an òtukapa 4 angelnao kadishitapan 4 imi'i baara shakaru kida di'ii, ïzaamatapan awaru kida, aonaa kizi awaru nii imi'i baara'a oo paran ii oo atamun baawu an. <sup>2</sup>Udauna'an òtukapa ba'oran angel wa'atin waoko iki, una'akapa kakupa'o Tominkaru kinaariba. Uparadan diiwa'o ida'an wunao ati'i 4 angelnaouz,

utaan ma'ozaka-karu ï'ati, ïpataka'uu-kinnao nii imi'i baara na'iki paran. <sup>3</sup>Angel kian ï'ati, "Aonaa zii ukaziwa'ana'a imi'i baara, paran oo atamun kida atii wakainaabatan dauna'an zii waTominkarun pidanannao, ïtawu kida ida'a."

<sup>4</sup>Aizii wuru'u Tominkaru pidanannao kainaabata-kariwainauz pataawu kida ida'a kowaada-ka'o ò'ati ïiriban 144,000. ïnao wuru'u 12 Israel takaandaunnao tonaazinaa bii iki'oraz ïzaamata-ka'o. <sup>5-8</sup>12,000 zaamata-ka'o bouda'apa'o tonaazinaa kida di'iki, wunao kida di'iki'i: Judah, Reuben, Gad, Asher, Naphtali, Manasseh, Simeon, Levi, Issachar, Zebulun, Joseph, na'iki Benjamin di'iki.

***Iriba'o pidannao baokopatinpan***

<sup>9</sup>Uruu dauna'an òtukapa iriba'o manawun pidannao baokopatinpan aona'o turuu ïaita-ka'o! Kaawainauz na'ati wa'atin ipai bakadun wiizai kida di'iki, na'iki ipai bakadun ïdoko-zu-daunnao tonaazinaa kida di'iki, na'iki ipai bakadun ïmada kida di'iki, na'iki ipai bakadun ïparadan kida di'iki. Na'a ïkadishitapan umanawunu'oraz manawun tabai na'iki Kaznizo-dani kanaapu'u. ïkaiwadapa dawuu za'aba'i kida'o kamicha baraka'o, na'iki ïzaamatapan pokoridi anaba kawan kida'o paka'u kida ida'a. <sup>10</sup>Diiwa'o ida'an ïkian,

"Pugaru waTominkarun na'iki Kaznizo-dani kazannaata'oraz waunao.

Pugaru sakanatapa'oraz  
umanawunu'o manawun  
tabai ida'a."

<sup>11</sup> Ipai daunuuda'u angelnao kadishitan, awauta izikonuitapan wuru'u umanawunu'oraz manawun tabai, ipai kazowautapainao, na'iki 4 kakupa'o aimaakannao. Uruu dauna'an ipai iwashatinan, iwun baara kida apowa iti wuru kanaapu ati'i umanawunu'oraz manawun tabai, na'iki itaainan naa Tominkaru ati.

<sup>12</sup> Ikian,

"Amen!

Marii kizi Tominkaru  
konaukii-kida-kao  
umanawunun idi,  
na'iki uaitapaaban idi,  
na'iki ukaimanan idi;  
marii kizi umarainapa-kao  
unaobanain idi,  
na'iki uma'ozakan idi  
karikaonan na'iki  
karikaonan! Amen!"

<sup>13</sup> Udauna'an bauda'apa kazowautapainao bii iki'o pishaan ogaru. Ukian, "Kanom kaduznao wuru'u pidannaouz kaiwadapai-naouz baraka'o kamicha za'aba'i kida? Na'iki'oram iwa'atin?"

<sup>14</sup> "Onaobanaa, aonaa oaitapan, soo pugaru pa'an aitapa," okian u'ati.

Uruu dauna'an ukian o'ati, "Ipai wunaou'u dobatainaou'u naa kichana'iki-kii kida'o aimaakan kida baiaapa-kariwai. Ipai'ora'a naa ichikaan pakamichan za'a-

ba'i kida baraka, Kaznizo-dani izain idi.

<sup>15</sup> "Uruu idi ikadishitanpan Tominkaru taba kanaapu'u kaudinainao nii u'ati uwiizi ii ipai kamoo na'iki maruta'o; na'iki wuru'u Sakanatapa'oraz umanawunu'o manawun tabai ida'a una'auzon ni'i naa ituma utaaan idyaun. <sup>16</sup> Aonaa na'apainim nii izamaziizon oo imaaradakon, aonaa na'apainim nii ibaiapan kamoo wiichan powa'a, <sup>17</sup> Usha'apanum kau'an, Kaznizo-dani mashaapa'oraz maonapa umanawunu'oraz manawun tabai dazaba'a, utaaan nii idyaun na'apa kaznizo taapakaow kawan, una'akan nii idyaun nunudapa'o wunu di'iti, taa'oraz kakupa-kinai. Na'iki Tominkaru inoan nii kapam iwun uu kida ipai iwun iki."

*Kaznizo-dani so'otan 7th  
sakibadapa-kariwai scroll<sup>t</sup> di'iki*

**8** <sup>1</sup> Kaznizo-dani so'otan dono wuru'u 7th sakibadapa-kariwai scroll di'iki, sariapa amazada mashaadina'akan mashaa aokazi ii, ikoda mani pazikon an hour. <sup>2</sup> Udauna'an otukapa 7 angelnao kadishitan na'a Tominkaru kanaapu'u, na'iki taa-kao ikawana'ati, bauda'apa kida kuwudii. <sup>3</sup> Ba'oran angel kaawan ukadishitan maonapa altar dazaba'a, uzaamatapanii shanaribai kinnaa gold idi'o utoma-kao. Diri'i kaduunu'o

Rev

<sup>t</sup> 8:1 scroll: kaarita katoridau'u upapidapa-kao oo soolaa-kariwai madai kaiwauzo-kariwai saadapa-kizai nii. Panaadon da'i kaina'a usakibadapa-kinao kida, panaadon da'i bauda'apa oo iriba umuna an kida, maabaiba kawanu'o usakadan idi.



aimaakan kida taa-kaoshanaribai nii u'ati, ukawaodan nii Tominkaru ati upidanannao toriinpan tuma, na'iki umuudan naazu altar, gold idi'oraz utoma-kaos paawa ii, wuru'u umanawunu'oraz manawun tabai kanaapu ia'oraz. <sup>4</sup>Angel zaamatapaniaz shanaribai ka'awapa'o shan makon doko iti Tominkaru di'iti, Tominkaru pidanannao toriinpan kida tuma. <sup>5</sup>Uruu dauna'an angel paidadan shanaribai kinnaa wizi'lo tikazi tiriizi idi altar paawa iki, udauna'an ukaboota'akan naazu imi'i baara iti, sariapa na'ii kankan-kia'o na'iki toroanaru turuinan, na'iki imi'i nakainan ma'ozaka'o ida'an.

### 7 *kuwudiinao*

<sup>6</sup>Wuru'u 7 angelnao zaamatapanaouz pakawana'ati kuwudii kida minziawan naa ipoota'azon naa kidaz. <sup>7</sup>Kiwiitapa'o angel pootan pakuwuda, sariapa dadara kida'o wunu, kuba kawan, na'iki tikazi, izai tuma'o waotan imi'i baara ati. Uruu idi 1/3 imi'i baara ka'awan, na'iki ipai atamun na'iki pinidi na'a kida'o ka'awan.

<sup>8</sup>Udauna'an ba'oran angel pootan pakuwuda, sariapa aimaakan udaru'o midukuo ka'awapa'o kawanu'u, kaboota-kaos paran baoko iti. Uruu idi 1/3 paran baoko tanawatinan izai nii, <sup>9</sup>na'iki ipai mashaapainao na'a ubaoko'o mawakan, na'iki kanawa tuu'uz kida na'a'o, ipai imainaabata-kaos.

<sup>10</sup>Udauna'an 3rd angel pootan pakuwuda. Sariapa udaru'o na'iki

kanada'o wizi waotan doko iki, wa'ozinao na'iki wunu nunudapan di'iti. <sup>11</sup>Wizi uu "Kibia'o Manawun," uruu idi 1/3 ukibiidan wa'ozinao na'iki wunu nunudapa-kizi kida, na'iki iriba pidannao mawakan ituzan idi wuru'u wunu kibia'oraz manawun.

<sup>12</sup>Udauna'an 4th angel pootan pakuwuda. Sariapa 1/3 kamoo, kauzu, na'iki wiizinao zowita-kaos, uruu idi 1/3 kida ikanadan makadakaos. Na'iki 1/3 bauda'apa kamoo ida'a, aonaa ukanadan; na'iki na'apa kapam 1/3 bauda'apa'o maruta'o ida'a, aonaa ukanadan.

<sup>13</sup>Uruu dauna'an oawunuupan, otukapa udaru'o kokoi zuutapa'o doko ii. Ukian diiwa'o ida'an, "Kasha'ora'o nii! Kasha'ora'o nii! Kasha'ora'o nii manawun sha'apan ipai pidannao ati mashaapainaoz da'a'a imi'i baara'a, wuru poota-kaos dono'o idikinauda'u'oraz kuwudiinao, idikinauda'u'o angelnao pootan ni'oraz!"

**9** <sup>1</sup>Udauna'an 5th angel pootan pakuwuda, otukapa wizi waotauzoz doko iki imi'i baara ati, na'iki key taa-kaos u'ati, ka'unaru aona'oraz utokon nii keyannaa. <sup>2</sup>Wizi da'atan dono wuru'u ka'unaru aona'oraz utokon nii, kishana'o koditan bodo'okappan, na'apa tuubaru'o tikazi ka'awapa'o shan kawan. Uruu idi udikinidan kamoo, na'iki maruta utapan amazada. <sup>3</sup>Aonaa masakauda'u mani manorunao koditan tikazi shan di'iki imi'i baara ati, na'iki ima'ozakan taa-kaos na'apa kankoorun ma'ozakan kawan. <sup>4</sup>Aonaa



ītaapada-kaō īkaziwan pinidi oo ata-  
mun kida oo sha'apa'oram paoribai,  
mazan turuu īkaziwan pidannao  
pa'an, aona'oraz Tominkaru kaina-  
riba nii ītawu kida ida'a. <sup>5</sup>Wuru'u  
manorunaouz aonaa ītaapada-kaō  
īzowian pidannao sariapa, mazan  
ībaiatin-kidan nii īdyaun baka'iauda'u  
kauzu. Wuru kaziwanu'u īchiianiaz  
na'apa kankoorun chiinii kawan.  
<sup>6</sup>Uruu dono pidannao aipan nii  
padamata pamawakan, mazan aona'o  
nii īmawakan; īaipan pamawakan,  
mazan aonaa īmawakan.

<sup>7</sup>Wuru'u manorunaouz aidin-  
pan na'apa kawaronao kawan  
minziiwapa'oraz naa mizaataa-  
kapa-karu dau'ati; īzowau paawa'a  
kida kaina'a īkaiwadapan kowa-  
mai kawanu'o Gold idi'o utoma-kaō,  
na'iki īawun baara kida aidinpan  
na'apa pidan awun baara kawan.  
<sup>8</sup>īzowaud kida dawuan na'apa  
zun zowaud kawan, īudako kida  
na'apa lion dako kida kawan. <sup>9</sup>Kai-  
na'a īdokori'i dikiniribanaa kida  
chipirari idi'o kawanu'o, na'iki  
īkutuba aran kida tururukadappan  
na'apa tawuru kawanu'u iriba'o-  
raz kawaronao kozootapainaoz  
chariot<sup>u</sup> kida mizaataakapa-kizai  
iti'o kawan. <sup>10</sup>Kaina'a īdyuo kida  
ida'a īchiimikitin-kinaa na'apa kan-  
koorun kawan, na'iki uruu idi'o  
wuru'u īkaziwaanuz pidannao  
ībaiatin-kidan nii īdyaun baka'i-  
auda'u kauzu. <sup>11</sup>Kaina'a īnaobanaa  
king kazowautapa'o īdyaun, Hebrew

ida'an u'uu dakota-kaō Abaddon,  
na'iki Greek ida'an u'uu dakota-kaō  
Apollyon, (“Pataka'utauzo” kia'o  
wuru'u). Uruu angel awunuutapa'o-  
raz ka'unaru aona'oraz utokon nii.

<sup>12</sup>Wuru'u di'ora'a, kiwiitapa'o  
kasha'ora-karu baiaapa-kariwaiz  
kaiwainpa'aka'oraz naa shaabatapan  
naa wuru'u, kaina'iki dya'utama'a  
naa kasha'ora-karu kida kaiwain-  
pa'o nii zii.

<sup>13</sup>Uruu dauna'an 6th angel poo-  
tan pakuwuda. Ōabata parada-karu  
wa'atin 4 altar shakaru kida di'iki,  
gold idi'oraz utoma-kaō, Tominkaru  
kanaapu ia'oraz. <sup>14</sup>Parada-karu  
kian angel ati, “Pumuuda wuru'u  
4 angelnao dodotapa-kariwai-  
naouz udaru'o wa'ozī Euphrates  
dazaba ia'oraz!” <sup>15</sup>Uruu 4 angelnao  
taapa-kaō minziiwapa'a naa; wuru  
kamoo dau'ati'i aita-kariwaiz naa,  
uruu dono īzowian nii 1/3 pidan-  
nao. <sup>16</sup>Soldyaanao zaidapainaoz  
kawaronao, ōabata īdiri'in kowaada-  
kaō 200,000,000 īdyaun.

<sup>17</sup>Kaikapa'o wuru'u ōtukapan  
kawaronao na'iki zaidapainaoz  
ībarau'u kida: wunaou'u zaida-  
painaouz, kaina'a īkaiwadapan  
padokori'i dikiniribanaa kida,  
īaidinpan wuza tikazi kawan, blue  
sapphire<sup>v</sup> kawan, na'iki yellow  
sulfur<sup>w</sup> kawan. Kawaronao zowau  
kida aidinpan na'apa lionnao zowau  
kawan kida, na'iki īdako kida di'iki  
kodita tikazi, kashana'o na'iki  
pizo-pizowa'o sulfur. <sup>18</sup>Na'iki 1/3

Rev

<sup>u</sup> 9:9 *chariot*: soldyaanao tararan <sup>v</sup> 9:17 *sapphire*: uruu konaunama'o kuba.

<sup>w</sup> 9:17 *sulfur*: Putukapa kaarita tokon ii, Parada-karu Masha'apannaada-kinao di'ii.

pidannao zowii-ka'o da'a'a imi'i baara'a, wuru idi'i idikinauda'u'oraz pataka'utin-kinai kida: tikazi, kashana'o na'iki pizo-pizowa'o sulfur kodita'oraz kida kawaronao dako iki. <sup>19</sup>Wuru'u kawaronaoz ĩma'ozakan taa-ka'o uruu dono ĩdako na'iki ĩdyuo kida ida'a'o, uruu kida idi'o wuru'u ĩkaziwaanuz pidannao. ĩdyuo kida kazowau'o na'apa kowazaz zowau kawan.

<sup>20</sup>Aizii ipai pidannao, aona'oraz ĩmawakan na'apain wuru idi'i kichana'iki-kii kida'oraz pataka'utin-kinai kida, pakawan aonaa ĩmarina'atan patomanii aimakaan kida. Aonaa ĩmashaadan patorinpan oia'o doronainao ati, na'iki wunao ati'i ĩtomaniáz aimakaan kida gold idi, wizi'i'o chipirari idi, isha'o chipirari idi, kuba idi na'iki atamun idi, aona'oraz kanom ĩtukapan, ĩabatan oo aona'oraz ĩchi'ikan. <sup>21</sup>Na'iki aonaa ĩmarina'atan pazowiipann pairibannao, na'iki ĩsha'apaapan oia'o doronai ida'an aimakaan di'itinapa-kida'o pidannao, na'iki madoronaa-daun ĩkiaapaakan, na'iki ĩkoidimikin.

*Angel na'iki duusodi'o scroll<sup>x</sup>*

**10** <sup>1</sup>Uruu dauna'an otukapa ba'oran umanawunu'o angel wa'atin aokazi iki. Ukaiwadapanii kawanu'o isha'iz kamicha kaiwaadapa-ka'o kawan. Na'a'o kapam kiwari'i uzowau paawa an, uawun baara kanada'o

na'apa kamoo kawan, na'iki utaba'u kida na'apa doko'a'o tikazi kida maodapan kawan ĩaidinpan, <sup>2</sup>paka'u ida'a uzaamatapa duusodi'o scroll da'atinpa'o. Udauna'an umuudan padiwa'ora antanpu'o pakidiba paran paawa iti, na'iki umuudan pa'ashabaron antanpu'o pakidiba imi'i paawa iti. <sup>3</sup>Na'iki ukadakon diiwa'o ida'an na'apa lion kadakon kawan. Uruu dauna'an sariapa 7 toroanarunao dako'atinuzu, oaitapa na'apa'oram wuru'u ĩparadan kianuz. <sup>4</sup>Maonapa'ora'a naa o'saadan padamata na'apam ĩkian kida, upu'u mazan o'abatan parada-karu kian aokazi iki o'ati, "Pumashaapa zii! Mana'a pusaa-da'ana'a na'apam toroanarunao kian."

<sup>5</sup>Uruu dauna'an umanawunu'oraz angel, kadishitapa'oraz paran paawa ii, na'iki imi'i paawa'a sawadan padiwa'ora antanpu'o paka'u aokazi iti. <sup>6</sup>Uaipan idi paparadan mishida-ka'o, ukaiwaan Tominkaru uu, uruu karikaonanu'oraz ukukupan, toma'oraz aokazi na'iki ipai aimakaanao unazoa'oraz, uruu toma'oraz imi'i baara na'iki ipai aimakaanao unazoa'oraz, na'iki uruu toma'oraz paran na'iki ipai aimakaanao ubaoko'ia'oraz. Angel kian, "Aona'o ni'i naa Tominkaru zaudapan powa'a! <sup>7</sup>Mazan 7th angel pootan dono'o naa pakuwudu, umishian ni'i naa pasha'apata'azoonii, na'apa ukowaadauzon kawana'atizu kotua'a naa, uruu

<sup>x</sup> 10:1 scroll: Putukapa kaarita tokon ii, Parada-karu Masha'apannaada-kinao di'ii.

wuru'u kuwaiz, aona'oraz uaita-pauzo-ka, ukowaadauzoniaz papoitorunao, prophetnao ati.”

<sup>8</sup>Udauna'an ōabata parada-karu aokazi iki'o kian ō'ati koshan, “Pumako puzaamata'an wuru'u da'atinpa'oraz scroll, angel ka'u di'iki, kadishitapa'oraz paran paawa ii na'iki imi'i paawa'a.”

<sup>9</sup>Uruu idi ōmakon angel di'iti ōpishaan naa u'ai wuru'u duusodi'oraz scroll. Ukian ō'ati, “Puzaamatazu na'iki punika'a naazu. Pudako ii putiwaan niiz bishoo, mazan pudyokorautan dauna'an ukaawan nii putoba nazo iti katama'a naa.” <sup>10</sup>Uruu idi ōzaamatan naa wuru'u duusodi'oraz scroll angel ka'u iki ōnikan naazu! Ōdako ida'a ōtiwaanuz bishoo, mazan ukaawan ōtoba nazoo iti, sariapa ukataman.

<sup>11</sup>Udauna'an kii-karu ō'ati, “Pukowaada'ana'a naa koshan kanom Tominkaru aiapanii pasha'apatan ipai pidannao ati, bakadun kidaz iwiizi, īmada, īparadan, na'iki ipai kingnao ati.”

*Dya'utama'o prophetnao  
Tominkaru dyuudanii*

**11** <sup>1</sup>Uruu dauna'an aitaaribai atamun taa-ka ō'ati na'iki kii-karu ō'ati, “Pumako puaita'an kizi na'apam Tominkaru Dapu na'iki altar udarun, na'iki puaita na'apauda'um kaina'a pidannao choochiipainao unazo ii. <sup>2</sup>Mazan

aonaa puaita'ana'a na'apam Tominkaru Dapu panibazooti udarun, usha'apanum kau'an taa-kariwai'i naa wuru'u ba'oran pidannao ati, aona'oraz īmishidan Tominkaru. Īchi'ikaadanaan nii ipai donoi nazo an Tominkaru pidannao mashaapa-kiziz, na'iki īpataka'utan niizu 42 kauzu.<sup>ʏ</sup> <sup>3</sup>Na'iki ōtaan nii ma'ozaka-karu dya'utama'o ōprophetinnao ati īkakuwaapakinnaa nii mishi'oraz ōkuwaa dau'u, wuru dono'o 1,260 kamoo kidaz. Uruu dono īkaiwadan nii kamicha kasha'ora-karu daara īaida-kidakinnaa nii pakasha'oran pidannao oian dau'ati.”

<sup>4</sup>Wuru'u dya'utama'oraz Tominkaru prophetinnao, īnao wuru'u dya'utama'oraz olive kadunaa kida ni'oraz,<sup>z</sup> na'iki dya'utama'oraz lamp saabatinapa-kizi kida ni'oraz kapam kadishitapa'oraz Naobanai kanaapu ii, uruu kazowautapa'oraz ipai amazada. <sup>5</sup>Na'ia'oram pidan tiwaan an pasha'apatan dikauda'o aimakaan ītuma, īkodikidan nii tikazi padako iki kida, uruu idi'o nii īzowian patarubanao. Ukau'an na'apa'o ida'ana'o nii pidan mawakan utiwaan an pasha'apatan dikauda'o aimakaan ī'ati. <sup>6</sup>Kaina'a'o nii īma'ozakan taa-ka ō īmashaatapa-kinnaa nii wunu ukaawan ai, wuru dono'o īkakuwaapatinanuz Tominkaru paradan dau'u. Kaina'a kapam īma'ozakan taa-ka ō ītanawata-kinnaa nii wunu

Rev

<sup>ʏ</sup> 11:2 42 kauzu: na'apa'o wuru kawanu'o verse 3 ida'a'oraz 1,260 kamoo kidaz, na'apa'o kapam wuru kawanu'o Revelation 12:14 ida'a'oraz 3 1/2 wunu kawan.

<sup>z</sup> 11:4 Zechariah 4:3

izai nii, na'iki turuu ĩsha'apatan bakadun pataka'utin-kinai kida imi'i baara'a na'apainim karikao-nan paaipap kawana'ati.

<sup>7</sup>Īpaian dauna'an pakaku-waapan pidannao ati, wuru'u kichana'iki-kia'o pana'aokazi kodita'o ni'oraz imi'i waranu iki, mizaataakan nii ĩtuma, uzowian nii ĩdyaun mawaka. <sup>8</sup>Mawaka'o prophetnao na'ian nii mapudu'o dobaapa-kizai dunapo ii, umana-wunu'oraz donoi nazo ii. Na'ia'o kapam ĩnaobanaa Jesus taukauzokao cross di'iti. Uruu wuru'u donoiz dakota-kariwaiz kapam Sodom oo Egypt nii, usha'apanum kau'an pidannao na'ii sannao mashaapan idi oii, na'apa Sodom oo Egypt Baara sannao kawan. <sup>9</sup>Pidannao ipai wiizai kida di'iki, bakadun ĩdokoza-daunnao kida di'iki, bakadun ĩparadan kida di'iki, na'iki ipai bakadun ĩmada di'iki, ipai'o nii ĩtukapan Prophetnao mawakainaoz washatinpan 3 1/2 kamoo, na'iki aonaa ĩaipan ĩdida-kao. <sup>10</sup>Tuukia'o nii pidannao konaukian Prophetnao mawakan idi, usha'apanum kau'an kiwiin ĩpataka'utin-kidauzon ĩdyaun tuukii manawun. Uruu idi ĩkonaukiitinan nii, ĩdyuudan nii aimaakan kida pa'atiaaka kida.

<sup>11</sup>Mazan 3 1/2 kamoo dauna'an, Tominkaru kakudan nii ĩdyaun powaa iti koshan, uruu idi ĩkadishitan, na'iki ipai tukapainao ĩdyaun tarian. <sup>12</sup>Uruu dauna'an dya'utama'oraz Prophetnao abatan diiwa'o parada-karu aokazi

iki'o kian ĩ'ati, "Uwa'ati da'ati'!" kii. Īmakon naa aokazi iti isha'iz ida'an, pidannao manadapa-kainao ĩdyaun awunuutapan pu'u.

<sup>13</sup>Sariapa imi'i nakainan ma'ozaka'o ida'an manawun, na'iki 1/10 kabaunnao tonnaa kaboo'ii-kao. 7000 pidannao mawakan wuru idi'imi'i nakainanuz, ba'orainao wa'akinainao aona'o ĩmawakan, tuukii ĩtarian, uruu idi ĩkian, "Tominkaru aokazi ia'o, pugaru ma'ozaka'o manawun."

<sup>14</sup>Di'ora'a 2nd kasha'ora-karu kida, kaiwainpa'aka'oraz naa kida, shaabatapan naa wuru'u. Kaina'iki bauda'apa'a naa kasha'ora-karu, kadimana'o ni'i naa ukaiwainpan di'ora'a kida dauna'an.

### *7th angel pootan pakuwuuda*

<sup>15</sup>Uruu dauna'an uru'u naa 7th angel pootan pakuwuuda, na'ii ōabata diiwa'o ida'an parada-karu kida aokazi iki'o kian:

"Aizii di'ora'a dauna'an,  
soo wanaobanaa Tominkaru  
na'iki wuru'u  
uzaamataniaz Christ,  
kazowautapan ni'i naa ipai  
pidannao.  
Tominkaru kazowautapan nii  
karikaonan  
na'iki karikaonan!"

<sup>16</sup>Sariapa 24 kazowautapanao sakanatapainaoz pataba kida ida'a Tominkaru kanaapu'u, ipai ĩwashatinan paawun baara ikinapa imi'i baara iti, ĩtaainan naa u'ati. <sup>17</sup>Īkian:

"Wanaobanaa Tominkaru

umanawunu'o,  
pugaru na'auzoz amazada  
toma-kaou ua'ii,  
na'iki karikaonanu'o nii  
puna'an.

'Kaiman' wakian pu'ati,  
puaidan idi mishi'o  
puma'ozakan,  
na'iki pusakadani'i naa  
pukazowautapan!

<sup>18</sup> Ipai mamishida-kainao to'oran  
tuukii pu'ati,  
kaawa'a naa aizii puto'oran  
kamoon,  
pubuupan mawakainao  
kamoon kaawan naa.

Kaawa'a naa kamoo  
pukawinipinaata-kinaa nii  
pupoitorunao,  
wuru'u prophetnaouz,  
na'iki ipai pupidanannao  
taapainaoz pugaru  
umanawunu'o nii,  
manawun-tinpainao na'iki  
pataka'utinainao.

Kaawa'a naa kamoo  
pumainaabatan  
ipai pidannao zowiainao  
ba'oran pidannao da'a'a imi'i  
baara'a."

<sup>19</sup> Uruu dauna'an aka Tominkaru  
Dapu aokazi ia'o da'atinan na'iki  
na'ii otupakan kaimana'oraz pakara  
Tominkaru paradan pakarannaaz.  
Udauna'an na'a kan-kan-kia'o,  
toroanaru turuinan, imi'i nakainan  
na'iki dadara tuu'uz kida'o wunu  
waotan.

### Zuna na'iki Dragon<sup>a</sup>

**12** <sup>1</sup> Uruu dauna'an otukapa  
umanawunu'o di'itinapa-  
kinai aimaakan aidinan aokazi ii:  
Zuna kakamichantipa'o kamoo  
idi, na'iki kauzu okidiba waranu'u,  
na'iki kaina'a okaiwadapan king  
kowam kaduz, upaawa'a kaina'a 12  
wizinao. <sup>2</sup> Kaudani'o wuru'u orooz,  
odani shakata'azon idi'i naa ozaa-  
dan na'iki okadakoinan ukaziwan  
idi.

<sup>3</sup> Otupakan koshan ba'oran  
umanawunu'o di'itinapa-kinai  
aimaakan aokazi ii: na'ii otukapa  
udaru'o wuza'o Dragon, kaina'a'o 7  
uzowau na'iki 10 u'ozoo kida, na'iki  
ipai uzowau kida kawana'ati kaina'a  
king kowam kaduz kida. <sup>4</sup> Padyuo  
idi uto'otan doko iki 1/3 wizi-  
nao, udauna'an ukabootan idyaun  
imi'i baara ati. Dragon kadishitan  
zun kanaapu'u, unika'azon odani,  
ushakatan dono.

<sup>5</sup> Uru'u naa okaudanipa'akan  
naa daonaiora odani nii, uruu  
wuru'u kazowautapa'o ni'o-  
raz ipai pidannao da'a'a imi'i  
baara'a, pama'ozakan ida'an.  
Mazan koraidaonaa na'aka-kaou  
masha'apakiaka Tominkaru na'iki  
utaba di'iti. <sup>6</sup> Na'iki wuru'u zunaz,  
okidoopa'akan naa munapo pidan  
mashaapa-kizi ai, amazada iti,  
Tominkaru minziiwatanii di'iti,  
na'ii kaimana'o nii otaapa-kaou  
1,260 kamoo kawana'ati.<sup>b</sup>

<sup>a</sup> 12:1 *Dragon*: uruu oia'o doronai zowaunaa, udakota-kaou Satan. <sup>b</sup> 12:6 Putukapa  
footnote Revelation 11:2 saada-kaou 1,260 kamoo daua'oraz.

<sup>7</sup>Uruu dauna'an mizaa-taaka-karu aokazi ii. Michael, pa'angelinnao tuma mizaapan Dragon, na'iki Dragon pa'angelinnao tuma mizaapan powaa iti Michael. <sup>8</sup>Mazan winii-ka Dragon pa'angelinnao tuma, na'iki aonaa turuu imashaapan naa powa'a aokazi ii. <sup>9</sup>Uruu idi udaru'oraz Dragon na'iki uangelinnao kaboota-kaoa'a naa aokazi iki imi'i baara ati, uruu wuru'u dakota-kariwaiz kowazaz nii kotua'a naa, na'iki Devil oo Satan kii, uruu wuru'u sha'apata-kida'oraz oia'o pidannao ati umariidapan ida'an idyaun.

<sup>10</sup>Sariapa obatan aokazi ii parada-karu kian diiwa'o ida'an kaikapa'a: "Aizii waTominkarun kazannaatan papidananna kmoon kaawan naa! Aizii uaidan pamanawunun pakazowautapan ida'an king kawan, na'iki Christ, uzaamataniaz naobanai nii aidan pamanawunun kapam utuma. Usha'apanum kau'an aona'o ni'i naa powa'a Satan kadishitan Tominkaru kanaapu ii, ukaboota-ka idi'i naa aokazi iki imi'i baara ati. Uruu wuru'u kowaadapauzoz da'i kiwiin Tominkaru ati kanom wa'inawuzunao na'iki wadadakoonao sha'apatanii oii kida'oraz aimakaan ipai kamoo na'iki maruta'o Tominkaru ati. <sup>11</sup>Mazan wa'inawuzunao na'iki wadadakoonao winii Satan, Kaznizo-dani izain ida'an na'iki ikakuwaapan ida'an kaimana'o kuwai dau'u udau'oraz, na'iki aonaa itarian pazowia'azoo-ka ai. <sup>12</sup>Ukonau-

kii, unao mashaapainaoz aokazi ii, mazan unao mashaapainao imi'i baara'a na'iki paran baoko ii, ubaiaapan nii kasha'ora-karu tuukii, Satan kaawan idi'i naa unao ida'ati. To'ora uruu, uaitapan idi aona'a naa amazada turuuan usha'apata-kida-kinaa nii oia'o."

<sup>13</sup>Dragon aitapan idi'i naa pakaboota-ka imi'i baara ati, uru'u naa udawatan zun shakata-kida'oraz da'i daonaiora. <sup>14</sup>Mazan dya'utam udaru'o kokoi kutuba kawan kida'o taa-ka o'ati, ozuuta-kinaa nii pawiizi iti amazada iti munapo'o pidan mashaapa-kizi ai. Na'ii kaimana'o nii otaapa-ka Dragon ai 3 1/2 wunu kawana'ati.<sup>c</sup>

<sup>15</sup>Uruu dauna'an Dragon kodita-kidan wunu padako iki, kadimana'o ushootan wa'ozu kawan zun dawu'ati uaipan wunu na'akan oroo munapo. <sup>16</sup>Mazan imi'i kamin-ka'uta wuru'u zunaz, uda'atinan ida'an utoman ka'unaru, uruu idi ipai wunu morotan ushaawata. <sup>17</sup>Uruu idi Dragon to'oran zun ati na'iki umakon umizaataaka'anan ba'oran odainao tuma mishidainaoz Tominkaru paradan na'iki taapainaoz Jesus kuwaa.

<sup>18</sup>Udauna'an Dragon kadishitan paran danoma ii.

### *Dya'utam pana'aokazinao*

**13** <sup>1</sup>Udauna'an otukapa bau da'apa kichana'iki-kia'o pana'aokazi koditan paran baoko iki. Kaina'a 10 u'ozoo na'iki 7

<sup>c</sup> 12:14 Putukapa footnote Revelation 11:2 saada-ka, 3 1/2 wunu daua'oraz.

uzowau; ipai u'ozoo kida kawana'ati kaina'a king kowam kaduz kida, na'iki ipai uzowau kida kawana'ati kaina'a uuai saadinpan dakoopa'o Tominkaru. <sup>2</sup>Wuru'u kichana'iki-kia'oraz pana'aokazi aidinpan na'apa baudokoru kitannaaru kawan, ukidiba kida udaru na'apa bear<sup>d</sup> kidiba kida kawan, na'iki udako na'apa lion dako kawan. Dragon taan naa wuru'u kichana'iki-kia'o pana'aokazi ati pataba na'iki pama'ozakan na'apa kizi ukazowautapan paugaru kawan kapam. <sup>3</sup>Bauda'apa kichana'iki-kia'o pana'aokazi zowau, tuukia'o uzowiauzo-ka, mazan manaka'a naa powaa itiz. Uruu idi ipai pidannao imi'i baara ainaouz tuukii idi'itinpan, na'iki ida'anan naa wuru'u kichana'iki-kia'oraz pana'aokazi. <sup>4</sup>Ipai pidannao taapan umanawunu'o nii wuru'u Dragon, utaan idi pama'ozakan kichana'iki-kia'o pana'aokazi ati. Na'iki umanawun nii kapam itaapan kichana'iki-kia'o pana'aokazi. Ikian, "Aonaa kanom ma'ozaka'o nii uruu kawan. Kanom ka'iita pawiniinuz, pamizaataakan ida'an utuma?"

<sup>5</sup>Uruu dauna'an wuru'u kichana'iki-kia'oraz pana'aokazi ma'ozakan taa-ka u'atadinapakinanaa nii na'iki na'apa'o kida ida'an udakooan Tominkaru. Ukazowautapan taa-ka 42 kauzu. <sup>6</sup>Udakooan Tominkaru,

u'uu, umashaapa-kizi na'iki ipai mashaapainao aokazi ii. <sup>7</sup>Taa-pada-ka u'umizaapan Tominkaru pidannao na'iki uwinii idyaun pama'ozakan ida'an. Na'iki taapada-ka ukazowautapan ipai pidannao, ipai bakadun kidaz idokozu-daunnao kida, iwiizi, iparadan na'iki imada. <sup>8</sup>Ipai pidannao taapan umanawunu'o nii wuru'u kichana'iki-kia'o pana'aokazi. Inao wuru'u pidannao aona'oraz i'uu kida saadinpan kakupa-karu kaaritan-naa<sup>e</sup> ida'a amazada toma-ka u'aii. Wuru'u kaaritz zowiauzo-kariwai Kaznizo-dani kaaritan wuru'u.

<sup>9</sup>Puabatan an na'apam okian, ukau'an puabata'a naa kaiwuru'u parada-karuz. <sup>10</sup>Na'ia'oram pidan aiapa-kariwai utaraa-ka, mishi'o nii utaraa-ka; na'ia'oram pidan aiapa-kariwai uzowii-ka marii idi, mishi'o nii uzowii-ka marii idi. Ukau'an marii kizi Tominkaru pidannao tuudan papataka'utakao na'iki marii kizi pakawan imishidapan uruu.

<sup>11</sup>Uruu dauna'an otukapa ba'oran kichana'iki-kia'o pana'aokazi koditan imi'i ka'azo iki. Kaina'a dya'utam u'ozoo kaznizo dani kawan, na'iki uparadan na'apa Dragon paradauzon kawan. <sup>12</sup>Na'iki na'apa koshan uma'ozakan kiwiitapa'o kichana'iki-kia'o pana'aokazi kawan na'iki na'apa usha'apatan aimaakan kida uaipan kawana'ati.

<sup>d</sup> 13:2 bear: udaru'o na'iki to'ora'o. Ukaiwaanii pabazi za'aba'i kida pazowii-kinanaa nii aimaakan. Kaina'a udikin Parada-karu Masha'apannaada-kinanao di'ii.

<sup>e</sup> 13:8 kakupa-karu kaaritan-naa: Tominkaru pidannao uu saada-kizinao, imashaa-pan nii Tominkaru tuma karikaonan.



Uruu idi udyuudan ipai imi'i baara anainao pidannao taapan umanawunu'o nii wuru'u kiwiitapa'oraz kichana'iki-kia'o pana'aokazi, kaku-da'oraz naa pazowii-ka'o dauna'an tuukii. <sup>13</sup>Na'iki uaidan umanawun kida'o aimakaan di'itinapa-kida'o pidannao atii uwaota-kida zii tikazi aokazi iki imi'i baara ati ipai ĩawunuutapan pu'u. <sup>14</sup>Na'iki ipai upozawata-kidan pidannao mashaapainaoz imi'i baara'a uaidan ida'an wuru'u umanawun kida'oraz aimakaan, kiwiitapa'oraz kichana'iki-kia'o pana'aokazi awunuutapan pu'u. Na'iki udyuudan ĩtoman aimakaan na'apa'o kiwiitapa'oraz kichana'iki-kia'o pana'aokazi kawan uaidinpan, uruu tawuru'u zowiauzo-kariwaiz tuukii, na'iki kakuda'oraz naa powaa iti. <sup>15</sup>Udauna'an uma'ozakan taa-ka'o unizoin-kidan wuru'u toma-kariwaiz aimakaan, na'iki turuu kizi uparadan kapam. Uruu idi udyuudan ipai pidannao aona'oraz ĩdawukan pa'ati zowii-ka'o.

<sup>16</sup>Tuukii kichana'iki-kia'o pana'aokazi<sup>f</sup> dyuudan ipai pidannao, pataka'utinainao na'iki manawun-tinpainao, kapuraatanu'o na'iki mapuraatanu'o, poitorui na'iki aonaa poitorui mani kinaabata-kidinan padiwa'ora antanpu'o paka'u kida ida'a oo pataawu kida ida'a. <sup>17</sup>Na'iki aonaa turuu pidan toriinan oo selliipan sha'apauzii, kinaaribai aonaan an u'ida'a, uruu wuru'u kiwiini'oraz kichana'iki-

kia'o pana'aokazi uuaz, na'iki uruu wuru'u u'uu aitaapa-kinaoz.

<sup>18</sup>Da'a'a uaiapa aitaapaaba-karu, kanom aitaapaaba'o marii kizi uaitapan kichana'iki-kia'o pana'aokazi uu aitaaribanaa, usha'apanum kau'an uruu kainaabata'oraz pidan uu kapam, wuru'u 666 kia'oraz.

*Kaznizo-dani na'iki pidannao  
ukazannaataniinao*

**14** <sup>1</sup>Uruu dauna'an ōawunuupan koshan ōtukapa Kaznizo-dani kadishitapan Zion naawa'a, na'iki kaina'a utuma 144,000 pidannao, ĩnao wuru'u kaina'a'oraz u'uu na'iki udaru uu saadinpan ĩtawu kida ida'a. <sup>2</sup>Na'iki ōabata parada-karu aokazi iki'o na'apa tozowan shaokodappan kawanu'o, na'iki toroanaru turuinan kawanu'o. Wuru'u ōabataniaz tauapatinainao kawanu'o shamoro<sup>g</sup> kida ida'an. <sup>3</sup>Uruu 144,000 pidannao kunuuan naa pa'ina'o kunui umanawunu'oraz manawun tabai kanaapu'u, na'iki 4 kakupa'o aimakaanoo kanaapu'u, na'iki 24 kazowautapainao kanaapu'u. Aonaa turuu ba'oran pidannao kunuuan wuru'u kunuiz, soo wuru'u 144,000 pidannao pa'an, ĩnao wuru'u Tominkaru kazannaataniinaouz. <sup>4</sup>ĩnao wuru'u aona'oraz na'apainim ĩkiitauzon zun, uruu idi kaiman ĩtaapan pananaa. ĩnao wuru'u da'ana'oraz Kaznizo-dani umakon dono na'itim karikaoan. ĩnao wuru'u kiwiitapa'oraz

<sup>f</sup> 13:16 *kichana'iki-kia'o pana'aokazi*: uruu kowaada-kariwaiz verse 11 di'ii.

<sup>g</sup> 14:2 *shamoro*: Putukapa kaarita tokon ii, Parada-karu Masha'apannaada-kinao di'ii.



ĩkazannaata-kaŋo imi'i baara'a, ĩnao taa-kariwaiz Tominkaru na'iki Kaznizo-dani ati. <sup>5</sup>Aonaa na'apainim ĩmariidinauzon, na'iki aonaa ĩsha'apatauzon oia'o.


### *Idikinauda'u'o angelnao*

<sup>6</sup>Uruu dauna'an ōtukapan bouda'apa angel zuutapan doko ii, ukowaada'azon Kaimana'o Kuwai karikaonanu'oraz umishiin Tominkaru di'iki'o ipai pidannao ati, mashaapainaoz ipai amazada kawana'ati kida da'a'a imi'i baara'a, bakadun kidaz ĩwiizi, ĩdoko zunnao, ĩparadan, na'iki ĩmada. <sup>7</sup>Ukian diiwa'o ida'an, "Utaapa'a naa Tominkaru umanawunu'o nii na'iki ukonaukii-kida'a naa uruu." Kaawa'a naa kamoo aita-kariwaiz, ubuuapa-kinaa nii ipai pidannao da'a'a imi'i baara'a. Utaapa'a naa Tominkaru umanawunu'o nii, uruu wuru'u toma'oraz aokazi, imi'i baara, paran na'iki wunu nunudapa kida'oraz.

<sup>8</sup>Udauna'an 2nd angel aidiinan kiwiitapa'oraz angel dawu'ati. Ukian, "Mainaabata-kaŋo'a naa! Mainaabata-kaŋo'a naa Babylon umanawunu'oraz donoi. Babylon sha'apatani madoronaa-daun kida'oraz oia'o, ipai owaota-kidan ba'oran wizainao kida da'a'a imi'i baara'a, otaan kawanu'o wine ĩtuzan nii, uruu wuru'u ma'ozaka'oraz wine okiaapa-kidinanuz madoronaa-daun. Ona'apan idi'o Tominkaru pataka'utan oroŋ."

<sup>9</sup>Uruu dauna'an ōtukapa 3rd angel aidiinan kiwiitapainao dawu'ati. Ukian diiwa'o ida'an, "Ipa pidannao taapainao kichana'iki-kia'o pana'aokazi patominkarun nii, na'iki toma-kariwai uruu kawanu'oraz, na'iki ipai kaina'a'o ukainaariba kida ĩtawu kida ida'a oo ĩdiwa'ora antanpu'o ĩka'u kida ida'a, <sup>10</sup>ipai'o nii kapam ĩtuzan wine wuru'u Tominkaru to'oranuz. Uruu ma'ozaka'oraz manawun wine Tominkaru shootan ni'oraz pato'oran kooponnaa nazo iti ĩtuzan nii. Di'ora'a pidannao pataka'uta-kaou'o nii ĩdyaun, ka'awapa'o sulfur<sup>h</sup> idi, angelnao na'iki Kaznizo-dani awunuutapan pu'u. <sup>11</sup>Wuru'u tikaziz pataka'uta'o ni'oraz ĩdyaun, ushan bodo'okapan nii karikaonan na'iki karikaonan, aonaa na'apainim nii ĩbaiatinan shaabatan. ĩnao wuru'u taapainaoz kichana'iki-kia'o pana'aokazi patominkarun nii na'iki toma-kariwai uruu kawan, na'iki kaina'a'oraz ukainaaribanaa u'uuaz ĩ'ida'a."

<sup>12</sup>Ukau'an marii kizi Tominkaru pidanannao ma'ozakadinan ĩtuuda kizi papataka'utakaŋo. Pakawan kizi ĩizo'atin Tominkaru kiki-naori kida na'iki ĩda'anan Jesus p a m i s h i d a n tuma.



*dimana'o  
soopara korau-  
baba (14:14)*

Rev

<sup>h</sup> 14:10 sulfur: Putukapa kaarita tokon ii, Parada-karu Masha'apannaada-kinao di'ii.

<sup>13</sup>Uruu dauna'an òabatan aokazi iki'o parada-karu kian, "Pusaada di'ora'a: Wunaou'u mishidainouuz Naobanai Jesus, konaukia'o nii ìdyaun ìmawakan an di'ora'a dauna'ana'a." Udauna'an Kaimana'o Doronaa kian, "Mishi'o wuru'u. Ìsookapan ni'i naa dadara kida'o pakaudin-kizi ai, ipai aimaakan kaiman kida'oraz ìsha'apatan aitapa-kida-ka'o nii."

*Kasaba'uapa-karu paoribai  
aka imi'i baara'a*

<sup>14</sup>Udauna'an òawunuupan òtukapa baraka'o isha'iz. Kaina'a pidan kawanu'o sakanatapan isha'iz paawa'a. Kaina'a king kowam kaduz gold idi'o utoma-ka'o uzowau paawa'a, na'iki kaina'a uzaamatapan dimana'o soopara paka'u ida'a. <sup>15</sup>Uruu dauna'an ba'oran angel koditan Tominkaru Dapu aokazi ia'o di'iki. Diiwa'o ida'an ukian wuru ati'i sakanatapa'oraz isha'iz paawa ia'o ati, "Aizii pusa'uka'a naa paoribai kadunaa kida pusoo paran idi, ipai paoribai aka kida da'a'a imi'i baara'a'oraz dyuua'a naa kidaz, kaawa'a naa kamoo turuu kizi'i naa ìkasaba'uu-ka'o!" <sup>16</sup>Udauna'an wuru'u sakanatapa'oraz isha'iz paawa'a kaudina'akan naa pasooparan ida'an. Ipai ubaokopatan paoribai aka da'a'a imi'i baara'a.

<sup>17</sup>Uruu dauna'an òtukapa ba'oran angel koditan Tominkaru Dapu aokazi ia'oraz di'iki, kaina'a u'ida'a

dimana'o soopara kapam.

<sup>18</sup>Na'a'o ba'oran angel, ukoditan altar dazaba iki, uruu wuru'u taapa'oraz tikazi. Ukian diiwa'o ida'an angel zaamatapa'oraz dimana'o soopara ati, "Pukaiwa'a naa pusooparan, pudukuta'a naa grape kida pakadunaa kida di'iki da'a'a imi'i baara'a, usha'apanum kau'an ozoka'a naa grape kida." <sup>19</sup>Uru'u naa ukaudina'akan naa pasooparan ida'an imi'i baara'a, ipai udukutan grape kida pakadunaa kida di'iki. Udauna'an umuudan naa kidaz grape dakazaa-kizinao nazo iti,<sup>i</sup> uruu wuru'u Tominkaru to'oranuz. <sup>20</sup>Grape kida dakazaa-ka'o na'iki u'uu sararoo-kaoz paniba ia'o wii-zai ai. Grape uu sararoo-ka'o dono'o naa, izai kodita na'iki, ushootan wa'ozi kawan, umakon munapo 200 miles mani, na'iki baka'iauda'u feet mani ukaanan.

*Angelnao na'iki dawu'itiini'o  
pataka'utin-kinai kida*

**15** <sup>1</sup>Uruu dauna'an òtukapa ba'oran umanawunu'o di'itinapa-kinai aimaakan aokazi ii. 7 angelnao zaamatapan 7 pataka'utin-kinai kida, uruu ìkaduzunnaa. Ìkaiwainan dauna'an kida aona'o ni'i naa Tominkaru to'oran powa'a.

<sup>2</sup>Udauna'an òtukapa paran, glass taidada tikazi tuma'o kawanu'o. Na'iki na'a udazaba'a òtukapa kapam taonawu'u winiainaouz da'i kichana'iki-kii kida'o pana'aokazi, ìmadawuka'azookan ida'an toma-

<sup>i</sup> 14:19 Kuba ida'a'o ka'unaru kichada-ka'o udaru'o, udakota-ka'o 'winepress' kii.

kariwai uruu kawanu'o ati na'iki aona'o ãtaapadan pakainaabata-kaao ukainaariba idi uruu wuru'u u'uu aitaaribanaaz kapam. Na'iki ãzaamatapanii shamoro<sup>j</sup> kida, Tominkaru taaniaz ã'ati. <sup>3</sup>Na'iki ãkunuuan naa Moses kunu, Tominkaru poitoruz, na'iki Kaznizo-dani kunu kapam wuru'u. Kaikapa'a ãkunuuanzu'u:

“Naobanai Tominkaru pugaru umanawunu'o,  
pusha'apata umanawun  
kida'o aimaakan  
di'itinapa-kinai kida.  
Pugaru King nii ipai wiizai  
kida ati,  
ipai wuru kida'a  
pusha'apatanii kidaz  
ipai ukaimanan na'iki  
umishiin.

<sup>4</sup>Kanom aona'o nii utarian  
pu'ai, Naobanai.  
Ipai pidannao  
kowaadan nii pugaru  
umanawunu'o.  
Pugaru puba'oran kaimana'o.  
Ipai pidannao ipai wiizai kida  
di'iki  
wa'atin nii pu'ida'ati,  
ãdawuka'anan pu'ati.  
Usha'apanum kau'an ipai  
kanom pusha'apatanii  
kida,  
ipai usakitapan na'iki  
umishiin.”

<sup>5</sup>Uruu dauna'an õtukapa Tominkaru Dapu aokazi ia'o, Tabernacle<sup>k</sup>

da'atinan. <sup>6</sup>Wuru'u 7 angelnao zaamatapainaoz 7 pataka'utin-kinai kida koditan Tominkaru Dapu nazo iki, ãkaiwadapanii maniriba'o kamicha wizi'i kida'o, na'iki ãkaiwadapanii zadawii kawanu'o gold idi'o utoma-kaao, didimai kaiwada-kaao kawanu'o padokori'i kida paawaan. <sup>7</sup>Uruu dauna'an bouda'apa, 4 kakupa'o aimaakannao bii iki'o, taan 7 angelnao ati, 7 boon kida gold idi'o ãtoma-kaao paida kida'o Tominkaru to'oran idi, uruu mashaapa'oraz karikaonan na'iki karikaonan. <sup>8</sup>Sariapa Tominkaru Dapu nazoo kashana'akan tuukii, Tominkaru umanawunun na'iki uma'ozakan na'an idi'i naa, aonaa turuu pidan morotan unazo iti, atii 7 pataka'utin-kinai kida ipain, wuru'u 7 angelnao zaamatapaniaz kida.

*7 boonnao paida kida'o  
Tominkaru to'oran idi*

**16** <sup>1</sup>Uruu dauna'an õabatan diiwa'o parada-karu Tominkaru Dapu'u iki'o kian 7 angelnao ati, “Umako ushoota'ana'a naa wuru'u 7 boon zo'o kida'oraz Tominkaru to'oranzuz, imi'i baara iti.”

<sup>2</sup>Kiwiitapa'o angel makon ushootan naa paboonan wazoo imi'i baara iti. Sariapa kachama'idiikia'o kaziwa'o kabisho-karu kaawan wunao ida'ati'i, kaina'oraz kichana'iki-kia'o pana'aokazi, kainaariba kida ã'ida'a, na'iki

Rev

<sup>j</sup> 15:2 *shamoro*: Putukapa kaarita tokon ii, Parada-karu Masha'apannaada-kinao di'ii.  
<sup>k</sup> 15:5 *Tabernacle*: Putukapa kaarita tokon ii, Parada-karu Masha'apannaada-kinao di'ii.

dawukainaouz toma-kariwai uruu kawanu'o ati.

<sup>3</sup>Udauna'an 2nd Angel shootan paboonan wazoo paran baoko iti. Sariapa wunu tanawatinan mawaka'o pidan izain kawan uaidinpan, na'iki ipai aimaakannao mashaapa'o paran baoko'o mawakan.

<sup>4</sup>Udauna'an 3rd Angel shootan paboonan wazoo wa'ozinao na'iki wunu nunudapainao kida di'iti, ipai itanawatinan izai nii. <sup>5</sup>Ōabata Angel taapa'oraz wunu kian,

“Pugaru kaimana'o  
Tominkaru,  
pugaru na'auzoz amazada  
toma-kao ua'ii,  
na'iki karikaonanu'o nii  
puna'an.  
Sakitapa'o mishi wuru'u  
pupataka'utanuz pidannao  
kaikapa'a.

<sup>6</sup>Īnao wuru'u zowia'oraz  
pupidanannao  
na'iki puprophetinnao,  
uruu idi'o ukau'an  
putuza-kidan izai ī'ati  
īwinipinaa nii.”

<sup>7</sup>Uruu dauna'an ōabata paradaru altar di'iki'o kian.

“Oo Naobanai Tominkaru,  
pugaru mishi  
umanawunu'o nii  
manawun,  
sakitapa na'iki kaiman  
pusha'apatan aimaakan  
pupataka'utanuz īdyaun.”

<sup>8</sup>Udauna'an 4th angel shootan paboonan wazoo kamoo di'iti, kamoo wiichan, wiicha manawun uwiichauzon ai, ukawaodan ipai

pidannao pawiiichan idi. <sup>9</sup>Ipai pidannao kawaoda-kariwainao uwiichan idi, oiaiman kida ĩparadan Tominkaru ati, utaapadan idi wuru kida sha'apanu'u pataka'utin-kinai kidaz. Upu'u mazan aonaa itanawatinan pa'oian ai, na'iki aonaa ĩdakotan Tominkaru umana-wunu'o nii.

<sup>10</sup>Udauna'an 5th angel shootan paboonan wazoo kichana'iki-kia'o pana'aokazi taba paawa iti, ipai amazada marutan ukazowautapakizi ii, na'iki ipai upidanannao kuzowan paninoba kida, ĩbaiaapan idi kaziwa'o kabisho-karu. <sup>11</sup>Oiaiman kida ĩparadan Tominkaru aokazi ia'o dau'an, pamada kida kabishon na'iki ukaziwan idi tuukii manawun. Upu'u aonaa ĩkasha'oran na'iki aonaa itanawatinan Tominkaru di'iti pa'oian kida ai.

<sup>12</sup>Udauna'an 6th angel shootan paboonan wazoo udaru'o wa'ozi Euphrates iti, sariapa wa'ozi maaran arada, kingnao pasoldyaannao tuma, wa'ati-kizi nii waoko iki. <sup>13</sup>Udauna'an ōtukapa idikinauda'u oia'o doronainao, kibaronao kawanu'o ĩaidinpan kida, bauda'apa koditan Dragon dako iki, ba'oran koditan kichana'iki-kia'o pana'aokazi dako iki, na'iki ba'oran koditan mariidinauzo prophet dako iki. <sup>14</sup>Wuru'u oia'o doronainaouz kaina'a'o ĩma'ozakan taa-kao ĩsha'apata-kinnaa nii umanawun kida'o aimaakan. Īmakon nii ipai kingnao kawana'ati imi'i baara ainaouz ĩbaokopa-

ta'azon ĭdyaun mizaataaka'o nii Tominkaru umanawunu'o tuma, ukamoon kaawan dono. Na'apai-ni'o nii Tominkaru winian ĭdyaun tuukii.

<sup>15</sup>Jesus kian, “Puabata! Ōwa'atin nii koidimiki kaawan kawan, konaukia'o nii pidan mashaapa'oraz pokodapa na'iki taapa'oraz pakamichan minziiwapa'a naa, aonaa kizi uchi'ika'anpan makamichan-daun, udauna'an uba'azootinan pidannao ati.”

<sup>16</sup>Udauna'an oia'o doronainao baokopatan ipai kingnao amazada ida'ati dakota-kariwaiz Hebrew ida'an Armageddon kii.

<sup>17</sup>Udauna'an 7th angel shootan paboonan wazoo doko iti. Diiwa'o ida'an parada-karu koditan umanawunu'oraz manawun tabai di'iki, Tominkaru Dapu'u ia'o di'iki. Ukian, “Aizii ipai'i naazu.” <sup>18</sup>Sariapa kankan-kia'o na'iki toroanaru turuinan, na'iki imi'i baara nakainan ma'ozaka'o ida'an manawun. Aonaa na'apainim imi'i baara nakainauzon ma'ozaka'a naa manawun di'ora'a kawanu'u, kiwiini'o pidannao toma-kao di'iki'o ai. <sup>19</sup>Imi'i nakainan idi umanawunu'oraz donoi Babylon tada'okan idikinauda'u, na'iki uruu idi kapam ipai ba'oran donoinao imi'i baara'a'oraz mainaabatanan. Aonaa Tominkaru manyukunuu-tan Babylon, uruu idi utuza-kidan naa ipai wine wuru'u pato'oranuz pakooon zo'iki o'ati. <sup>20</sup>Ipai imi'i baara paran ii kida'o mainaabatanan, na'iki ipai midukuo kida mainaabatanan kapam. <sup>21</sup>Dadara

tu'uz kida'o wunu kuba kawan, waotan imi'i baara ati pidannao paawa ati kida, ĭkimishan kida 100 pounds. Tominkaru pataka'utan idi pidannao tuukii, wuru idi'i uwaotakidanuz dadara tuu'uz kida'oraz wunu ĭpaawa ati, tuukii ĭdakoautapan uruu.

*Donoi zun kawanu'o ikoda'o  
puraata pananaa ida'an*

**17** <sup>1</sup>Udauna'an bouda'apa angel, 7 angelnao bii iki'o kaawan ō'ida'ati, ĭnao tawuru'u zaamatapauzonaouz 7 boon kida paida'oraz da'i pataka'utin-kinai kida idi, na'iki ukian ō'ati, “Da'ati'i, ōaida-kida kizi pu'ati na'apam nii Tominkaru pataka'utan wuru'u umanawun-tinpa'oraz zun ikoda'oraz puraata pananaa ida'an. Oroo wuru'u umanawunu'oraz donoi mashaapa'oraz maonapa iriba'o wa'ozinao dazaba'a. <sup>2</sup>Ipai kingnao, imi'i baara ainao, iriba ĭsha'apatan oia'o ĭkiaapan ida'an oroo, na'iki ipai pidannao imi'i baara ainao po'idin otaanii wine idi, uruu wuru kawanu'orazu'u okiaapa-kidinan madoronaa-daun ĭ'ati.”

<sup>3</sup>Tominkaru Doronaa kazowautan idi ōgaru, angel na'aka'akan naa ōgaru amazada mapidantaka'o di'iti. Na'ii ōtukapan zun sakanatapan wuza'o kichana'iki-kia'o pana'aokazi paawa'a, na'iki kaina'a saadinpa'o uuai kida ipai umada ida'an dakoopa'o Tominkaru. Wurru'u kichana'iki-kia'oraz pana'aokazi kaina'a 7 uzowau na'iki 10 u'ozoo. <sup>4</sup>Wuru'u

Rev

zunaz okaiwaadapanii kamicha kida wuza za'o na'iki wuza'o, na'iki okonaunamadan pakamichan, na'iki pamada gold idi'o utoma-ka'o kida idi, kawinipina'o kuba kida pabi'inaaka'o ĩtaan kida idi, na'iki pearls<sup>l</sup> kida idi. Paka'u ida'a ozaamatapan koopo gold idi'o utoma-ka'o, paida'o wine idi, uruu wuru'u kachama'idiikii kida'oraz osha'apatan kida okiaapa-kidinuz pabi'inaaka'o daonaioranao ati. <sup>5</sup>Kaina'a otawu ida'a uuai saadinpan aona'o uaitapa-ka'o. Kaikapa'ora'a: "Manawunu'o donoi Babylon, pugaru selliipauzonao pananaa, na'iki sha'apaapainao oia'o tuukii manawun daro, da'a'a imi'i baara'a." <sup>6</sup>Na'iki otukapa opo'idin Tominkaru pidannao izain idi, na'iki wunao izain idi'i zowiauzo-kariwainauz pamishidan idi Jesus.

Ötukapan idi osha'apatan aimakan kaikapa'a, tuukii öd'iitinpan. <sup>7</sup>Angel kian ö'ati, "Kanom nii pud'iitinpan tuukii? Ökowaadan nii pu'ati aona'oraz uaitapauzo-ka'o wuru dau'a'a zunaz na'iki wuru'u kichana'iki-kia'oraz pana'aokazi ozaidapaniaz, uruu wuru'u kaina'oraz 7 uzowau na'iki 10 u'ozoo. <sup>8</sup>Wuru'u kichana'iki-kia'oraz pana'aokazi putukapaniaz kakupauz da'izu kiwiin, mazan aizii aona'a naa ukakupan, maonapa'o ni'i naa ukoditan ka'unaru aona'oraz utokon

nii nazo iki upataka'uta-kidina'anan naa. Kaina'a pidannao mashaapainao da'a'a imi'i baara'a, aona'o ĩ'uu kida saadinpan kakupa-karu kaaritanna<sup>m</sup> ida'a amazada toma-ka'o ua'ii, tuukia'o nii ĩdi'itinpan wuru dau'a'a kichana'iki-kia'oraz pana'ao-kazi, ukakupauzon idi da'i kiwiin, aizii aona'a naa ukakupan, mazan uwa'atin nii powaa ati koshan.

<sup>9</sup>"Da'a'a uaiapanii aitapaabakaru. Wuru'u 7 kichana'iki-kia'o pana'aokazi zowau, 7 naawaz wuru'u. ĩnao paawa'a kida'a wuru'u zun sakanatapanuz. ĩnao 7 kingnao kapam: <sup>10</sup>baka'iauda'u ĩdyaun mawaka'a naa, bauda'apa kaina'a ukazowautapan kai, ba'oran kaini'iki'o nii zii uwa'atin. Ukaawan dono aona'o nii ukazowautapan kotua'iki. <sup>11</sup>Wuru'u kichana'iki-kia'oraz pana'aokazi kakupa'oraz da'i kiwiin, aizii aona'a naa ukakupan, uruu kapam wuru'u 8th king ni'oraz. Uking-tinpan nii itamau, uruu 7 kingnao bii iki'o kapam. Uruu dauna'an upataka'uta-ka'o ni'i naa.

<sup>12</sup>"Wuru'u putukapaniaz 10 u'ozoo, ĩnao wuru'u 10 kingnaouz, aona'oraz zii ĩkazowautapan, mazan ĩma'ozakan taa-ka'o dono'o naa, ĩkazowautapan nii masakauda'u karikaonan, kichana'iki-kia'oraz pana'aokazi tuma. <sup>13</sup>Ipai'o nii ĩbauda'apatan padi'itinpan, ĩtaan nii baokopa pama'ozakan na'iki pakazowautapan kichana'iki-kia'o

<sup>l</sup> 17:4 *pearls*: kawinipina'o kashoro kida. <sup>m</sup> 17:8 *kakupa-karu kaaritanna*: Tominkaru pidannao uu saada-kizinao, ĩmashaapan nii Tominkaru tuma karikaonan.

pana'aokazi ati. <sup>14</sup>Baokopa'o nii kingnao na'iki kichana'iki-kia'o pana'aokazi mizaapan Kaznizodani, mazan Kaznizo-dani na'iki udapadaniinao, uwidauniinao, na'iki uda'angepikinao mishidainaouz uruu, winian nii idyaun, usha'apanum kau'an uruu ma'ozaka'o Naobanai nii ipai ba'oran naobanainao ai, na'iki umanawunu'o king nii ipai ba'oran kingnao ai.”

<sup>15</sup>Angel kian ò'ati kapam, “Wuru'u iriba'o wa'ozinao, zun selliipauzoz pananaa sakana-tapa kiziz, ñao wuru'u pidannao, mashaapa'oraz ipai amazada kawana'ati da'a'a imi'i baara'a. <sup>16</sup>Wuru'u kichana'iki-kia'oraz pana'aokazi na'iki 10 ozo kida putukapaniaz, to'ora-kizaitapan nii wuru'u zun selliipauzoz pananaa. Ipai'o nii ñzaamatan osha'apauz kida na'iki ñwa'akan niizo makamichan-daun, na'iki ñnikan nii odunaa na'iki ñkawaodan nii oroo tikazi idi. <sup>17</sup>Tominkaru taan nii ñ'ati ñdi'itinapa-kinaa nii ñsha'apata kizi uaiapanii, uruu idi baokopa ñtaan pama'ozakan kichana'iki-kia'o pana'aokazi ati ukazowautapa-kinaa nii, atii Tominkaru paradan mishii-nan. <sup>18</sup>Wuru'u zunaz putukapaniaz, oroo wuru'u udaru'oraz donoi kazowautapa'oraz ipai kingnao imi'i baara'a.”

*Umanawunu'oraz donoi  
Babylon mainaabata-ka*

**18** <sup>1</sup>Kiwiini'o aimaakan kida sha'apan dauna'an, na'a òtukapan ba'oran umana-

wunu'o angel wa'atin aokazi iki koshan, na'iki ukanadan, kanadapan ipai amazada. <sup>2</sup>Ukian diiwa'o ida'an “Mainaabata-kaoa'a naa, mainaabata-kaoa'a naa wuru'u umanawunu'oraz donoi Babylon. Mazan aizii oia'o doronainao na'iki kotu'uznao, aona'oraz ñnikauzokao mashaapan ni'i naa na'ii. <sup>3</sup>Babylon dakota-kariwaiz zun nii, taan wine ipai pidannao tuzan nii, uruu wuru'u ma'ozaka'oraz wine, okiaapa-kidinanuz madoronaa-daun ñ'ati. Ipai kingnao imi'i baara ainao sha'apatan oia'o ñba'orantapan ida'an odau'u. Na'iki ipai selliipauzonao pasha'apauz kida da'a'a imi'i baara'a, ipai ñkapuraatan-dinan powa'a zii otoriipauzon idi da'i iriba kawinipinaa kida'o aimaakan ñ'ai.”

<sup>4</sup>Uruu dauna'an òabatan ba'oran parada-karu aokazi iki'o kian, “Ukodita'a naa o'ai, òpidanannao, mana'a utompa'ana'a oia'o okawan, aonaa kizi Tominkaru pataka'utatan unao oroo kawan. <sup>5</sup>O'oian kida kasaba'uka-kaoko doko'o atii kaawa aokazi iti, aonaa Tominkaru manyukunuutan wuru'u oii kida'oraz osha'apatan. <sup>6</sup>Utaapa'a naa oroo na'apa otaapauzon kawan unao. Utaa'a naa uwinipinaa nii o'ati, powa'a zii manawun upataka'uta oroo, opataka'utauzon ai unao. Upaidada okoopon riwunii idi powa'a'oraz zii uma'ozakan otomanii ai. <sup>7</sup>Marii kizi ubaiaapakidan o'ati tuukii kaziwa'o na'iki kasha'ora-karu, wuru wadaun ni'i na'a o'atadapanuz pakasha'apau-



zin. Okian padau'an, Ògaru Queen, òsakanatapan òtaba ida'a, aonaa na'apainim nii òkasha'orauzon, zun kasha'oran kawan mawaka'oraz naa odaiaru.<sup>7</sup> 8Ukau'an bauta'apa kamo'o nii Tominkaru pataka'utan oroo, di'ora'a pataka'utin-karu kida idi'i: mawaka-karu, kasha'ora-karu na'iki zamazi-karu kidaz. Na'iki kawaoda-kao nii oroo tikazi idi, usha'apanum kau'an Tominkaru umanawunu'oraz papataka'utan nii oroo paaipan kawana'ati."

<sup>9</sup>Ipai kingnao imi'i baara'o, kiaapainauz oroo na'iki kaiwai-nao osha'apauz, ipai'o nii ìzaadan na'iki ìkasha'oran odau'ati, ìtukapan dono tikazi shan bodo'okapan kawaodapa'oraz oroo. <sup>10</sup>Ìkadishitapan nii munapo donoi ai ìtarian idi, aonaa ìbaiaapa'azon kaziwa'o wuru'u obaiaapaniaz. Ìkian nii, "Kasha'ora'o manawun! Kasha'ora'o manawun sha'apan pu'ati, pugaru umanawunu'o donoi. Masha'apakia'o Tominkaru pataka'uta'akan pugaru."

<sup>11</sup>Pidannao imi'i baara ainoo toriipauzonao na'iki selliipauzonauz sha'apauzii, tuukia'o nii ìzaadan Babylon dau'ati, usha'apanum kau'an aona'a naa kanom toria'o nii ìsha'apauz kida powa'a. <sup>12</sup>Aonaa kanom torian naa ìsha'apauz kida powa'a, wuru'u gold, silver, kawinipinaa kida'o kuba kida, pearls.<sup>n</sup> Na'iki aonaa kanom torian kawinipinaa kida'o kamicha

mada, wuzuzo'o na'iki wuzo kida'o, na'iki silk idi'o kamicha mada toma-kao. Na'iki aonaa kanom torian aimakaan kida toma-kariwaiz kaduunu'o udamainan atamun idi, ipai aimakaan toma-kariwaiz ivory<sup>o</sup> idi, kawinipina'o atamun kida idi, chipirari kida idi, na'iki marble<sup>p</sup> idi. <sup>13</sup>Na'iki aonaa kanom torian cinnamon, spice, incense, myrrh na'iki frankincense, ipai wuru kida'a kawinipina'o kaduunuribai toma-kariwai oil nii na'iki paodaa nii. Na'iki aonaa kanom torian wine na'iki olive oil, poroom aka boodinpa'o na'iki aona'o zii uboodinpan. Na'iki aonaa kanom torian tapi'iza kida na'iki kaznizoo, kawaro kida na'iki ìtararannaa kida, na'iki ìsellii kapam pidannao poitoruinao nii, mazan aizii aona'a naa kanom torian ì'ai kidaz.

<sup>14</sup>Pidannao selliipauzonauz pasha'apauz kian nii o'ati, "Ipai aimakaan kida puapaniaz tuukii pu'ati mainaabatina'a naa, na'iki ipai puwaziwaan kawinipina'o na'iki umanawun kida'o pusha'apauz. Na'iki aonaa na'apainim nii pukasha'apauzin na'apa'o aimakaan kida idi powa'a." <sup>15</sup>Wuru'u pidannao selliipauzonauz da'i pasha'apauz, kapuraatan-dinan ìselliiipauzon idi da'i pasha'apauz kida donoi ii, ipai'o nii ìkadishitapan munapo donoi ai aonaa ìbaiaapa'azon wuru'u obaiaapaniaz. Tuukia'o nii ìzaa-

<sup>n</sup> 18:12 *pearls*: kawinipina'o kashoro kida. <sup>o</sup> 18:12 *ivory*: aimakaan toma-kariwaiz elephant dako za'aba'i kida di'iki. <sup>p</sup> 18:12 *marble*: kawinipina'o kuba.



dan, <sup>16</sup>na'iki ikian, “Kasha'ora'o manawun! Kasha'ora'o manawun sha'apan pu'ati umanawunu'o donoi, konaunam kida'o kamicha kida pukaiwaadapauzon wuza za'o na'iki wuza'o, pukonaunamadan pakamichan, na'iki pumada gold idi'o utoma-ka'o kida idi, kawinipina'o kuba kida idi pabi'inaaka'oraz itaan kida, na'iki pearls. <sup>17</sup>Na'iki masha'apakiaka puwaziwaan ipai wuru kida'a pukapuraatan-din-kinaa kidaz.”

Ipai na'akapainao udaru kida'o kanawa, na'iki wa'atiinao inazo'o kida, kaudinainao kanawa kida ida'a na'iki ipai baokoinao pidannao ikoda'o papuraatan soo paselliipan ida'an pasha'apauz kida kanawa ida'an ipai wiizai kida kawana'ati, ipai ikadishitapan munapo donoi ai. <sup>18</sup>Na'iki itzaadan nii itukapan dono tikazi shan bodo'okapan kawaodapa'oraz oroo. Ikian nii, “Aonaa ba'oran donoi umanawunu'o nii wuru kawanu'o.” <sup>19</sup>Imuudan imi'i unuba kida pazowau paawa iti kida itaida-kinaa nii na'apam pakasha'oran tuukii manawun. Tuukia'o nii itzaadan, na'iki ikian nii, “Kasha'ora'o manawun! Kasha'ora'o manawun sha'apan pu'ati'i umanawunu'o donoi. Ipai kakanawaniinao udaru'o kanawa kida idi chi'ikapauzonaouz ipai wiizai kawana'ati selliipauzo oo toriipauzonaouz sha'apauzii kida, ipai ikapuraatan-dinan otoriipauzon idi isha'apauz kida okapuraatanun idi manawun. Na'iki masha'apakiaka owaziwaan ipai pasha'apauz kida.”

<sup>20</sup>Ukonaukii ipai mashaapainao aokazi ii, Tominkaru pataka'utan idi'i naa Babylon. Ukonaukii Tominkaru pidannao na'iki apostlenao na'iki prophetnao, Tominkaru pataka'utan idi'i naa oroo, aimakaan osha'apatanii kidaz unao ati'o wadaun ni'i naa.

<sup>21</sup>Udauna'an umanawunu'o angel zaamatan udaru'o kuba na'iki ukabootanuzu paran baoko iti. Ukian, “Kaikapa'o nii umanawunu'oraz donoi Babylon kaboota-ka'o ma'ozaka'o ida'an na'iki aonaa na'apainim nii otukapauzo-ka'o powa'a. <sup>22</sup>Aonaa na'apainim nii shamoro aran kida abata-ka'o, na'iki aonaa pidannao kunuutinauzonao abata-ka'o, na'iki aonaa tauapatinauzonaouz da'i flute na'iki trumpet kida ida'an abata-ka'o punazo ii powa'a. Aona'o nii kaudinauzonao nii punazo ii, na'iki aona'o nii poroom aka booda-kariwai nii punazo ii. <sup>23</sup>Aonaa na'apainim nii lamp kanadapan tukapa-ka'o punazo ii, aonaa na'apainim nii mazidainao paradan abata-ka'o punazo ii powa'a. Pupidanannao selliipauzonao sha'apauzii kida umanawunu'o nii itaapinpan da'a'a imi'i baara'a, na'iki isha'apata oia'o doronai ida'an umanawun kida'o aimakaan kida di'itinapa-kida'o pidannao, na'apa'o ida'an imariidapan idyaun.”

<sup>24</sup>Babylon pataka'uta-ka'o Tominkaru prophetinnao na'iki upidanannao na'iki ipai zowiauzo-kariwainao imi'i baara'a izain ikoda-ka'o idi'o na'ii.

**“Wakonaukii-kida waTominkarun”**

**19** <sup>1</sup>Ipai wuru kida sha'apan dauna'ana'a, òabata iriba'o pidannao paradan kawanu'o aokazi ii. Diiwa'o ida'an ìkian, “Wakonaukii-kida waTominkarun! Uruu kazannaatin-kinai, umanawunu'o na'iki ma'ozaka'o. <sup>2</sup>Sakitapa'o na'iki kaimana'o wuru'u usha'apataniaz, upataka'utanuz umanawun-tin-pauzoz zun, selliipauzoz pananaa. Osha'apata-kidan ida'an oia'o ipai pidannao ati da'a'a imi'li baara'a, Tominkaru pataka'utan oroo, ozowiauzon idi'o upoitorunao.” <sup>3</sup>Powa'a koshan iriba'oraz pidannao aokazi ia'o kian, “Wakonaukii-kida waTominkarun! Tikazi kawaodapa'oraz oroo, ushan bodo'okapan nii karikaonan na'iki karikaonan, aonaa na'apainim nii umashaadan.”

<sup>4</sup>Sariapa 24 kazowautapainao na'iki 4 kakupa'o aimakannaoz kida,<sup>q</sup> ipai ìwashatinan paawun baara ikinapu, ìtaainan naa Tominkaru ati, sakanatapa'oraz umanawunu'oraz manawun tabai ida'a ati. Ìkian “Amen! Wakonaukii-kida waTominkarun!”

***Kaznizo-dani mazidan daua'o***

<sup>5</sup>Udauna'an parada-karu kian umanawunu'oraz manawun tabai di'iki, “Ukonaukii-kida waTominkarun, ipai unao upoitorunao, pataka'utina'o na'iki manawun-tinpa'o, taapainaoz Tominkaru umanawunu'o nii.”

<sup>6</sup>Udauna'an òabatan iriba'o kawanu'o pidannao kadakoinpan, na'apa tozowan shaokodappan kawanu'o, na'iki toroanaru turuinan kawanu'o. Ìkian, “Wakonaukii-kida Tominkaru, usha'apanum kau'an uruu wanaobanaa, umanawunu'o King. <sup>7</sup>Wakonaukii tuukii, wakonaukii-kida Tominkaru umanawunun, Kaznizo-dani mazidan kmoon kaawan naa, na'iki udaiaro ni'o min-ziiwapa'a naa oroo. <sup>8</sup>Taa-kao o'ati maniriba'o wizi'l'o kawinipina'o kamicha okaiwadan nii.” (Wuru'u kawinipina'oraz kamicha, uruu wuru'u kaiman kida'oraz Tominkaru pidanannao sha'apatani kida.)

<sup>9</sup>Udauna'an angel kian ò'ati, “Pusaada di'ora'a: konaukia'o nii wunaou'u dapada-kariwainaoz mazida'o Kaznizo-dani aroapa-kizi ati.” Powa'a zii angel kian, “Di'ora'a mishi'o kuwai Tominkaru di'iki'o.”

<sup>10</sup>Òwashatina'akan naa ukanaapu'u ukidiba dazaba'a òawun baara ikinapu, òtaapa'azon naa uruu umanawunu'o nii, mazan upu'u ukian ò'ati, “Mana'a pusha'apata'ana'a na'apa'o, ògaru Tominkaru poitoru kapam, na'apa pugaru na'iki pumin-mishidannao kawan, ìnao wuru'u kowaadapauzoz pamishidan Jesus, ukau'an soo Tominkaru pa'an turuu putaapan umanawunu'o nii.” Wuru'u kuwai Jesus kainaabataniaz, mishi'o pa'an, uruu wuru'u ma'ozakada'oraz pidannao, ìkakuwaapan dono Tominkaru paradan dau'u.

<sup>q</sup> 19:4 Putukapa wuru'u aimakannao kida dau'u Revelation 4:6-8 ida'a.

***Baraka'o kawaro na'iki  
zaidapa'oraz ubarau'u***

<sup>11</sup>Uruu dauna'an òtukapa aokazi da'atinan, kaina'a baraka'o kawaro na'ii, na'iki kaina'a zaidapa'o ubarau'u udakota-kaò “Kaimana'o pidan, mishi'o ukuwaa Tominkaru daua'o.” Sakitapa'o wuru'u upataka'utanuz pidannao pa'oiàn dikin ii, na'iki umizaataakanuz patarubanao tuma. <sup>12</sup>Uawun kida kanadan na'apa tikazi pururu'ukappan kawan, na'iki ukaiwadapanii iriba king kowam kaduz kida pazowau paawa'a. Kaina'a u'uu saadinpan unanaa ida'a, mazan soo uruu pa'an aitapa na'apa'oram wuru'u saada-kariwaiz. <sup>13</sup>Dawuu za'aba'i'o kamicha ukaiwadapanii izaita'o, na'iki u'uu “Tominkaru paradan,” kii. <sup>14</sup>Iriba soldyaanao aokazi ikiinao makon udawu'ati, ìzaidapanii baraka'o kawaro kida na'iki ìkaiwadapanii baraka'o maniriba'o kamicha kida. <sup>15</sup>Dimana'o marii dya'utama'o udabaazi kida dimanainpan kodita'akan udako nazo iki, uruu ida'ana'o nii uwinian ipai wiizainao kida. Ukazowautapan nii ìdyaun pama'ozakan ida'an, na'iki udakazaan nii ìdyaun grape kawan, grape uu sararoo-kizinao ij, uruu wuru'u umanawunu'oraz Tominkaru to'oranuz. <sup>16</sup>Ukamichan za'aba'i ida'a, uokoba pa'inamun, kaina'a u'uu saadinpan. “Uruu umanawunu'o King ipai ba'oran kingnao ai, na'iki ma'ozaka'o Naobanai ipai ba'oran naobanainao ai.”

<sup>17</sup>Udauna'an òtukapan bau-da'apa angel kadishitapan kamoo paawa ii. Diiwa'o ida'an ukadakon kotu'uznao ati, zuutapainauz doko ii aka, ukian, “Uwa'ati da'ati'i, ubaokopatin kizi aroapa-kizai ida'ati, Tominkaru taan ni'oraz ida'ati. <sup>18</sup>Uwa'ati da'ati'i, unika'an kizi wunao dunaa kida'a: kingnao, soldyaanao na'iki ìzowaunanao na'iki wunao dunaa kida'a kawaronao na'iki ìzaidapikinao, na'iki ipai bakadun kida pidannao dunaa, wuru'u poitoruinao na'iki ba'orainao aonaa poitoruinao mani, umanawun-tinpa'o na'iki pataka'utina'o.”

<sup>19</sup>Uruu dauna'an òtukapa kichana'iki-kia'oraz pana'aokazi na'iki ipai kingnao imi'i baara ainaouz na'iki ipai ìsoldyaanao baokopatinan, ìmizaataaka'azon wuru tuma'a zaidapa'oraz baraka'o kawaro na'iki usoldyaanao tuma. <sup>20</sup>Mazan zaamata-kaò wuru'u kichana'iki-kia'oraz pana'aokazi, baokopa mariidinauzo prophet tuma, uruu wuru'u aida-kida'oraz umanawun kida'o aimakaan, kichana'iki-kia'o pana'aokazi aipan kawana'ati, uaidan idi na'apa kida'o aimakaan pidannao mishida uruu, ìnao wuru'u kaina'oraz kichana'iki-kia'o pana'aokazi kinaariba kida ìtawu kida ida'a na'iki ìnao dawuka'oraz toma-kariwai aimakaan uruu kawanu'o ati. Wuru'u kichana'iki-kia'oraz pana'aokazi na'iki mariidinauzo prophet, ipai dya'utam ìkaboota-kaò kakupa, Tuubaru'o Tikazi wu'iti, ka'awa-

pa'oraz sulfur<sup>r</sup> tuma. <sup>21</sup>Wuru'u zaidapa'oraz baraka'o kawaro kaiwaan marii kodita'oraz padako iki, dya'utama'oraz udabaazi kida dimanainpan, pazowii-kinnaa nii ipai isoldyaannao, na'iki ipai kotu'uznao nikan mawakainao dunaa atii abaapa kida idyaun.

### 1,000 wunu

**20** <sup>1</sup>Uruu dauna'an otukapa angel wa'atin aokazi iki, uzaamatapanii key ka'unaru aona'oraz utokon nii keyannaa, na'iki toromaro'o chain. <sup>2</sup>Uma'ozakan idi uzaamatan wuru'u dragonuz, uruu tawuru'u kotua'oraz kowazaz dakota-kariwaiz Devil oo Satan kii, udauna'an udo'ota'akan naa uruu chain idi, umashaapan nii na'apa 1,000 wunu kawana'ati. <sup>3</sup>Udauna'an angel kabootan uruu ka'unaru aona'oraz utokon nii nazo iti, dauna'an utarata'akan naaz na'iki udadarada'akan naaz, uruu aonaa kizi powa'a Satan sha'apata-kidan oia'o ipai pidannao ati umariidapan ida'an idyaun atii 1,000 wunu ipain. Uruu dauna'an umuuda-kaoo nii masakauda'u karikaonan.

<sup>4</sup>Udauna'an otukapa tabai kida, na'iki pidannao sakanatapainaoz ipaawa'a kida kaina'a ima'ozakan taa-kaoo ikazowautapa-kinnaa nii. Na'iki otukapa kapam wunao doronaa kida'a dukuta-kariwainaoz ikanau kida, ikakuwaapatinauzon idi Jesus na'iki Tominkaru paradan dau'u. Inao wuru'u aona'oraz

ikodoru'ukan kichana'iki-kia'o pana'aokazi ati, na'iki toma-kariwai aimaakan uruu kawana'ati, na'iki aonaa itaapadan pakainaabata-kaoo ukainaariba idi pataawu oo paka'u kida ida'a. Ipai'o nii ikakudan powa'a iti koshan na'iki ikazowautapan nii 1,000 wunu Christ tuma. <sup>5</sup>Di'ora'a kiwiitapa'o kadishita-karu powa'a iti mawaka-karu di'iki wuru'u. (Baokoinao mawakainao aona'o ikadishitan uruu dono, diina'iti'o nii zii pa'an ikadishitanu'u 1,000 wunu ipain an.) <sup>6</sup>Konaukia'o nii manawun wunaou'u kadishitainaoz kiwiitapa'o kadishita-karu ida'a, aona'o nii ibaiapan pataka'utin-karu wuru'u baiapa-kariwai ni'oraz u'itamautan mawaka-karu di'ia'oraz. Mazan ikaudinanao ni'inao Tominkaru na'iki Christ ati, na'iki ikazowautapan nii utuma 1,000 wunu kawana'ati.

### Satan winii-kaoo daua'o

<sup>7</sup>Aizii 1,000 wunu kida ipain dauna'an, Satan kodita-kida-kaoo nii pataratapa-kizinao iki. <sup>8</sup>Umakon nii ipai wiizai kida kawana'ati, usha'apata-kidan nii oia'o umariidapan ida'an ipai pidannao, mashaapai-naouz da'a'a imili baara'a, inao wuru'u wiizai kida dakota-kariwainaoz Gog na'iki Magog kii. Satan kasaba'ukan nii ipai idyaun mizaa-taaka-kizai ati. Iriba'o nii manawun idyaun, na'apa kaatu diri'in paran danoma ana'o kawan. <sup>9</sup>Imakoo-

<sup>r</sup> 19:20 sulfur: Putukapa kaarita tokon ii, Parada-karu Masha'apannaada-kinnao di'ii.

danan ipai amazada kawana'ati da'a'a imi'i baara'a, na'iki awauta ïmashaapan ïzikonuitapan wuru'u Tominkaru pidanannao mashaapakiziz donoi, umarainpaniaz. Mazan tikazi waotan aokazi iki ipai ukawaodan ïdyaun.

<sup>10</sup>Udauna'an wuru'u Satan mariidapauzoz ïdyaun, ukabootakaoa'a naa Tuubaruo Tikazi wu'iti, ka'awapa'oraz pizo-pizowa'o sulfurtuma. Na'iti'o wuru'u ïkabootaunuz kichana'iki-kia'o pana'aokazi na'iki mariidinauzo prophet. Na'ia'o ni'i naa ïbaiatan tikazi ipai kamoo na'iki maruta'o, karikaonan na'iki karikaonan.

*Tominkaru buupan  
daua'o pidannao*

<sup>11</sup>Udauna'an òtukapa udaru'o umanawunu'oraz manawun tabai baraka'o na'iki kaina'a pidan sakanatapan upaawa'a. Sariapa imi'i na'iki aokazi ïmainaabatinan ukanaapu iki, aona'a naa ïtukapa-kaopowa'a. <sup>12</sup>Na'iki òtukapa mawakainao pidannao, umanawun-tinpainao na'iki pataka'utinainao, na'a ïkadishitapan umanawunu'oraz manawun tabai kanaapu'u. Na'iki òtukapa kaarita kida da'ata-kaoa'a naa. Uruu dauna'an ba'oran kaarita da'ata-kaokakupa-karu kaaritannaa.<sup>s</sup> Mawakainao pidannao pataka'uta-kaoa'a naa ïsha'apatanii kida kawana'ati, usaadinpan kawana'ati

kaaritanao ida'a. <sup>13</sup>Wuru'u mawakainao pidannao paran baoko ii, ïmakon naa Tominkaru kanaapu iti. Mawaka-karu na'iki Mawakainao Wiizi, sharakadan naa mawakainao makon Tominkaru kanaapu iti, na'iki upataka'utan naa ipai ïdyaun ïsha'apatanii kida kawana'ati. <sup>14</sup>Uruu dauna'an Mawaka-karu na'iki Mawakainao Wiizi kaboota-kaoa'a naa Tuubaruo Tikazi wu'iti. Di'ora'a, uruu u'itamautan mawaka-karu wuru'u. <sup>15</sup>Ipai pidannao, aona'o ï'uu kida saadinpan Kakupa-karu Kaaritannaa ida'a, ipai'o nii ïkaboota-kaotubaruo Tikazi wu'iti.

*Pa'ina'o aokazi na'iki  
pa'ina'o imi'i baara*

**21** <sup>1</sup>Uruu dauna'an òtukapa pa'ina'o aokazi na'iki pa'ina'o imi'i baara, kiwiitapa'oraz aokazi na'iki imi'i baara mainaabatina'a naa, na'iki paran mainaabatina'a naa kapam. <sup>2</sup>Na'iki òtukapa kaimana'o donoi, pa'ina'oraz Jerusalem, wa'atin apowa ati aokazi iki Tominkaru di'iki, wuru'u donoiz na'apa'o zun kawan kaiwadapa'oraz naa pamazidan daara paudaiaru ni'o kaawan ua'ii.

<sup>3</sup>Òabata diiwa'o parada-karu kian umanawunu'oraz manawun tabai di'iki, "Aizii di'ora'a dauna'an Tominkaru mashaapan ni'i naa papidanannao tuma, na'iki ïnaou'o nii upidanannao nii, na'iki

Rev

<sup>s</sup> 20:12 *kakupa-karu kaaritannaa*: Tominkaru pidanannao uu saada-kizinao, ïmashaapan nii Tominkaru tuma karikaonan.

una'an nii ĩtuma, na'iki uru'o nii ĩTominkarun nii. <sup>4</sup>Ipai'o nii uinoan ĩawun uu kida, aona'o ni'i naa powa'a pidan mawakan, oo kasha'oran, oo zaadauzon oo baiapan kaziwa'o. Usha'apanum kau'an kiwiitapa'oraz oia'o sha'apatauzo-kariwai kidaz mainaabata-ka'o idi'i naa."

<sup>5</sup>Udauna'an wuru'u sakanatapa'oraz umanawunu'oraz manawun tabai ida'a kian, "Aizii ipai'i naa o'pa'inaadan aimaakan kida!" Ukian koshan o'ati, "Pusaada di'ora'a parada-karu kida'a, mishi'oraz, na'iki marii kizi ĩmishida-ka'o kida." <sup>6</sup>Udauna'an ukian koshan, "Aizii ipai naazu! O'garu Alpha na'iki Omega,<sup>t</sup> wuru'u sakadin-kizaiz na'iki utokonnuz. O'taan nii maradako'inao ati wunu ĩtuzan nii, wuru di'iki'i wunu nunudapa'oraz taa'oraz kakupa-kinai mawinipinaa-daun. <sup>7</sup>Na'ia'oram pidan ma'ozaka'o na'iki wazoota'o oia'o, uzaamatan nii di'ora'a aimaakan kidaz o'idi'iki, na'iki o'garu'o nii ĩTominkarun nii, na'iki ĩnaou'u nii o'dainao nii. <sup>8</sup>Mazan pidannao tariainao pada'anan Jesus, pidannao muudinainaouznaa pamishidan ai Jesus, pidannao sha'apaapainao oia'o tuukia'a naa manawun, pidannao zowiainao ba'oran pidannao, pidannao madoronaa-daunu'o ĩkiaapaakan,<sup>u</sup> pidannao marunao-tinpainao, na'iki

mariidinauzonao. Ipai'o nii ĩpataka'uta-ka'o karishii kawanu'o tikazi ka'awapan sulfur<sup>v</sup> tuma'o nazo ii. Di'ora'a uruu u'itamautannaa mawaka-karu wuru'u."

### *Pa'ina'o Jerusalem*

<sup>9</sup>Bauda'apa angel kaawan o'ida'ati, tawunao bii iki'ora'a, <sup>7</sup>angelnao zaamatapauzonaouz ukaduzunuz naa pataka'utin-kinai kida. Ukian o'ati, "Puwa'ati da'ati'i, o'aida kizi pu'ati zun Kaznizo-dani daiaro ni'oraz." <sup>10</sup>Tominkaru Doronaa kazowautan idi o'garu, angel na'aka'akan naa o'garu doko'a'o midukuo powaa iti. Na'ii uaidan o'ati kaimana'oraz donoi Jerusalem wa'atin aokazi iki Tominkaru di'iki, <sup>11</sup>na'iki Kanada, Kanada donoi Tominkaru umanawunun idi. Donoi konaunaman uwizi'in, na'apa kawinipina'o kuba wizi'in kawan, na'apa jasper kawan na'iki kanuunu'o crystal kawan. <sup>12</sup>Wuru'u donoiz kaina'a'a ukorarannaa doko'a'o na'iki kaina'a <sup>12</sup>upaniinomizinaa kida, ipai ĩkawana'ati kaina'a bauda'apa angel awunuutapa'o. Ipai paniinom kida kawana'ati, kaina'a bauda'apa Israel dani-daun uu saadinpan. <sup>13</sup>Kaina'a idikinauda'u paniinom kida bauda'apa'o donoi korarannaa daba'a antanapu: idikinauda'u waoko ikinapa, idikinauda'u wakadapu ikinapa,

<sup>t</sup> 21:6 *Alpha na'iki Omega*: A-B-C kawanu'o atii Z di'iti. Mazan Greek ida'an, usakadinan Alpha di'iki, ukatokon-tinan Omega di'ii. <sup>u</sup> 21:8 Daonaioranao kiaapan zun oo zun kiaapa-kidinan daonaiora ati mamazidaaka-daun; mazida'o daonaiora kiaapan zun oo zun kiaapa-kidinan mazida'o daonaiora ati, aonaa omin-mazidan mani. <sup>v</sup> 21:8 *sulfur*: Putukapa kaarita token ii, Parada-karu Masha'apannaada-kinao di'ii.



na'iki idikinauda'u kida ba'orainao udabaazi kida ida'antanapu. <sup>14</sup>Wuru'u donoiz, ukorarannaa toma-kaao 12 kubanao kida paawa'a'o, na'iki ipai kuba kida kawana'ati, kaina'a bauda'apa Kaznizo-dani apostlen uu saadinpan. Inao wuru'u 12 apostlenaouz.

<sup>15</sup>Angel parada'oraz ò'ati zaamatapanii aitaaribai gold idi'o utoma-kaao atamun kawanu'u, uaitaa-kinnaa nii na'apam dii donoi udarun, upaniinomizinaa na'iki ukorarannaa kapam. <sup>16</sup>Na'apa kida'o udawuan wuru'u 4 donoi dabaazi kidaz. Angel aitaan naa wuru'u donoiz paaitaariba idi, 1500 miles udawuan, na'apa kapam ukazoan na'iki udoko'an udawuan kawan. <sup>17</sup>Angel aitaa kapam ukorarannaa, udoko'an 216 feet. Na'apa pidan aitaapa-kinnaa kawanu'o wuru'u angel kaiwaaniaz paaitaapa-kinnaa nii. <sup>18</sup>Donoi korarannaa toma-kaao jasper idi'o, na'iki ipai aimaakan kida donoi nazoo ia'oraz gold idi'o pa'idiwaru utoma-kaao kida, kanuunu'o glass kawan. <sup>19</sup>Wuru'u donoi korarannaa wiizi paawa kidaz, kawinipina'o kuba kida idi'o utoma-kaao wuru'u. Konaunama'o utoma-kaao di'ora'a kuba kida idi'i: jasper, sapphire, agate, emerald, <sup>20</sup>onyx, carnelian, quartz, beryl, topaz, chalcedony, turquoise, amethyst. <sup>21</sup>Wuru'u 12 paniinom kidaz, 12 pearls kida wuru'u, bauda'apa paniinom toma-kaao bauda'apa pearl idi. Kazowa'o dunapo mapudu'oraz ukaiwaapa-kaao donoi nazo ia'oraz, gold idi'o

pa'idiwaru utoma-kaao, turuu putukapan aimaakan unazo'o ia'o glass nazo'o ia'o kawan.

<sup>22</sup>Aonaa òtukapan Tominkaru Dapu nii donoi nazo ii. Aona'o nii uaiapa-kaao Naobanai Tominkaru umanawunu'oraz na'iki Kaznizo-dani mashaapan idi'i naa na'ii. <sup>23</sup>Aonaa kamoo oo kauzu aiapa-kaao kanadapa'o nii donoi, Tominkaru'o nii pa'an kanadapaz pamanawunun idi, na'iki Kaznizo-dani'o nii kanadapa unazo ii. <sup>24</sup>Ipai amazada kawana'ati pidannao mashaapan nii donoi kanadan ida'an, na'iki ipai kingnao imi'i baara ainao na'akan nii umanawun kida'o pasha'apauz donoi nazo ati. <sup>25</sup>Aonaa na'apainim nii upaniinomizinaa taratauzo-kaao, usha'apanum kau'an aona'o nii amazada marutauzon na'ii. <sup>26</sup>Ipai konaunam na'iki umanawun kida'o pidannao sha'apauz kida na'aka-kaao nii donoi nazo ati, ipai amazada iki kida. <sup>27</sup>Mazan ipai aimaakan kida aona'oraz ukaimanan, aona'o nii umorota-kida-kaao donoi nazo iti. Oo pidannao oipainauouz, dawukainauouz toma-kariwai tominkarunao ati, mariidinauzonaouz, aona'o nii ìmorotauzon donoi nazo iti. Soo wunaou'u nii pa'an morotakida-kaoa'a, kaina'a'oraz i'uu kida saadinpan kakupa-karu kaaritannaa ida'a, Kaznizo-dani kaaritanuz.

*Wa'ozì taa'oraz wunu kakupa-kinai*

**22** <sup>1</sup>Udauna'an angel aidan ò'ati wa'ozì taa'oraz wunu kakupa-kinai, kanuunu'o crystal kawan, kodita'oraz na'iki

Rev

shootapa'oraz Tominkaru na'iki Kaznizo-dani taba di'iki, <sup>2</sup>wa'ozi shootapan kazowa'o dunapo mapudu'oraz ukaiwaapa-kaao zikon an donoi nazo an. Wa'ozi danoma antanapu kida, kaina'a paoribai kida taa'oraz kakupa-kinai kaakapauzo da'i ipai kauzu kida kawana'ati. Na'iki ipai pidannao imi'i baara ainaouz kaiwaan paoribai anaba kida pakasarain-kinaa nii. <sup>3</sup>Aimaakan kida aona'oraz ukaimanan Tominkaru ati, aona'o nii umorotakida-kaao donoi nazo iti. Mazan Tominkaru na'iki Kaznizo-dani taba na'a'o ni'i naa pa'an donoi nazo ii, na'iki Tominkaru poitorunao, itaapan ni'i naa uruu umanawunu'o nii. <sup>4</sup>Itupakan nii Tominkaru awun baara, na'iki kaina'a'o nii u'uu saadinpan itawu kida ida'a. <sup>5</sup>Aona'o nii amazada marutauzon na'ii. Aona'o nii iaipan lamp kida oo kamoo kanadapa'o nii, usha'apanum kau'an Naobanai Tominkaru'o nii kanadapa idyaun na'iki ikazowautapan nii King kawan karikaonan na'iki karikaonanuo'o nii.

### *Jesus wa'atin daua'o*

<sup>6</sup>Udauna'an angel kian o'ati, "Ipai wuru'u parada-karu kidaz puabataniaz naa kida mishi'o wuru'u, na'iki marii kizi umishidakao. Na'iki Naobanai Tominkaru taa'oraz padoronaa paprophetinnao ati, dyuudan pa'angelin, uaida-kida kizi papoitorunao ati kanom sha'apan nii kadimana'a naa."

<sup>7</sup>"Uabata!" Jesus kian, "Kadimana'o ni'i naa o'wa'atin. Konaukia'o

nii wunaou'u izo'atiinaouz ipai parada-karu kida, saada-kariwai kidaz di'oraz kaarita ida'a'a, kai'o na'iki diina'iti'o daua'oraz kida'a."

<sup>8</sup>Ogaru John, abata'oraz na'iki tukapa'oraz ipai wuru'u aimakaan kida sha'apa'oraz. Oipaian dau-na'an oabatapan na'iki otupakan kidaz, owashatinan oawun baara ikinapa, angel aida'oraz o'ati ipai aimakaan kida kanaapu'u, ukidiba dazaba'a, otaapa'azon idi'i naa uruu umanawunu'o nii. <sup>9</sup>Upu'u mazan ukian o'ati, "Mana'a pusha'apata'ana'a na'apa'o! Ogaru poitorui karikaonan na'apa pukawan, na'iki pu'inawuzunao prophetnao kawan, na'iki ipai pidannao kawan izo'atiinaouz saada-karawaiz di'ora'a kaarita ida'a'oraz. Tominkaru pa'an putaapa umanawunu'o nii."

<sup>10</sup>Udauna'an ukian o'ati, "Mana'a pa'i putaapa'a naa mashaa wuru'u saada-kariwaiz, di'ora'a kaarita ida'a'orazu'u, kadimana'o ni'i naa usha'apan kida. <sup>11</sup>Ukau'an ipai pidannao sha'apaapa'o oia'o, marii kizi pakawan isha'apaapan oia'o, na'iki pidannao sha'apaapa'o dikauda kida'o kachama'idiikii kida'o aimakaan kida aona'oraz ukaimanan kida, marii kizi pakawan isha'apaapan kidaz. Na'iki pidannao sha'apata'o kaiman kida'o aimakaan, marii kizi pakawan isha'apatan kaiman kida'o aimakaan. Na'iki ipai pidannao kaimanainao, marii kizi pakawan imashaapan kaiman."

<sup>12</sup>"Uabata!" Jesus kian, "Kadimana'o ni'i naa o'wa'atin! Ona'akan nii



ōwinipa kida ōkawinipinaata-kinaa nii ipai pidannao īsha'apatanii kida kawana'ati. <sup>13</sup>Ōgaru Alpha na'iki Omega, wuru'u kiwiini'oraz na'iki dawu'itiini'oraz, sakadin-kizaiz na'iki utokonnuz.”

<sup>14</sup>Konaukia'o nii wunaou'u chikainaouz pakamichan za'abali kida kaiman. Turuu ukau'an īmorotan paniinom kida ida'an Donoi nazo iti na'iki turuu īnikan akai wuru di'iki'i paoribai taa'oraz kakupa-kinai. <sup>15</sup>Mazan wunaou'u, aona'o nii īmorota-kida-kaao Donoi nazo iti, madoronaa-daunu'oraz ītaapan pananaa, wunaou'u maru-nao-tinpainaouz. Na'iki pidannao kiaapaakainao mamazidaakadaun, pidannao zowiainao ba'oran pidannao, pidannao dawukainao toma-kariwai aimaakannao ati, na'iki ipai pidannao mariidinauzonao sha'apaapauzonaouz oia'o.

<sup>16</sup>“Ōgaru, Jesus, tawuru'u dyuuda'oraz da'i ō'angelin kakuwaapa'o nii ipai wuru kida dau'a'a unao ati, ipai choochi kida kawana'ati. Ōgaru David Takaan-daun na'iki ōgaru chaapi'iki'o wizi kanada'oraz.”

<sup>17</sup>Doronai na'iki Daiaroi<sup>w</sup> kian, “Puwa'ati'i naa!” Ipai pidannao abatainao di'ora'a, marii kizi kapam īkian “Puwa'ati'i naa!” Na'ia'oram pidan maaradako'o, marii uwa'atin uzaamata kizi mawinipi-

naa-daun wunu wuru'u taa'oraz kakupa-kinai.

***Ubaukapan naa kakinaowapakinai kida kowaada'azoo-kaao***

<sup>18</sup>Ōgaru John, kaimanaiman ōkakinaowan ipai pidannao abatainaouz kuwai kida kai'oraz na'iki diina'iti'o ni'oraz zii usha'apan kida daua'oraz, ōsaa-daniaz di'ora'a kaarita ida'a: Na'ia'oram pidan pana'ada'o powa'a zii kidaz, powa'a'o nii zii Tominkaru pataka'utan uruu, wuru idi'i 7 pataka'utin-kinai kidaz, kowaada-kariwai da'a'a kaarita ida'a. <sup>19</sup>Na'iki na'ia'oram pidan so'ota'o bauda'apa saada-kariwai di'ora'a kaarita di'iki'i, aona'o nii Tominkaru taapadan unikan akai utaa'azooniaz, paoribai taa'oraz kakupa-kinai akaz, na'iki aona'o nii utaan pidan wiizi ni'oraz utaa'azon kaimana'o donoi nazo ia'oraz, uruu kida wuru'u kowaada-kariwaiz di'ora'a kaarita ida'a.

<sup>20</sup>Pidan kakuwaapa'oraz wuru kida dau'a'a kian, “Mishi, kadimana'o ni'i naa ōwa'atin!”

Amen! Puwa'ati'i naa, wanaobanaa Jesus!

<sup>21</sup>Marii kizi Naobanai Jesus aidan pakamarainapanun ipai papidanannao ati. Marii kizi una'apan karikaonan.

Rev

<sup>w</sup> 22:17 *Daiaroi*: Kaznizo-dani daiaro ni'o wuru'u.